

卷之三

陳思王集卷之五

魏陳思王曹植子建著

安政七改令

黃初五年令

夫遠不可知者天也近不可知者人也傳曰知人則哲堯猶病諸諺曰人心不同若其面焉唯女子與小人為難養也近之則不遜遠之則有怨詩云憂心悄悄愠于羣小自世間人或受寵而背恩或無故而入叛違顧左右曠然無信大

嚼者咋斷其舌右手執斧左手執鉞傷夷一身之中尚有不可信况於人乎唯無深瑕潛釁隱過匿愆乃可以爲人諺曰穀千鴛不如養一驢又曰穀鴛養虎大無益也乃知韓昭侯之弊袴良有以也使臣有三品有可以仁義化者有可以恩惠驅者不足以導之則當以刑罰使之刑罰復不足以率之則明主所不畜故唐堯至仁不能容無益之子湯武至聖不能養無益之臣九折臂知爲良醫吾知所以待下矣諸吏各敬爾在位推一槩之平功之宜賞於疏必與罪之宜戮在親不赦此令之行有若皎日於戲群臣其覽之哉

其寶之者

宜其亦不如此今之

爾亦亦其

黃初六年令

身輕於鴻毛而謗重於泰山賴蒙帝王天地之
仁違百司之典議舍三千之首戾反我舊居襲
我初服雲雨之施焉有量哉孤以何功而納斯
貺富而不恡寵至不驕者則周公其人也孤小
人爾身更以榮爲戚何者將恐簡易之尤出於
細微脫爾之愆一朝復露也故欲脩吾往業守
吾初志欲使皇帝恩在摩天使孤心常存此地
將以全陛下厚德寃孤犬馬之年此難能也然

固欲行衆之難詩曰德輶如毛鮮克舉之此之謂也

寫灌均上事令

孤前令寫灌均所上孤章三臺九府所奏事及詔書一通置之座隅孤欲朝夕諷詠以自警誠

臨書一嚴... 此節今... 國... 上... 事... 令...

表

求自試表

臣植言臣聞士之生世入則事父出則事君事
父尚於榮親事君貴於與國故慈父不能愛無
益之子仁君不能畜無用之臣夫論德而授官
者成功之君也量能而授爵者畢命之臣也故
君無虛授臣無虛受虛授謂之謬舉虛受謂之
尸祿詩之素餐所由作也昔二虢不辭兩國之
任其德厚也且奭不讓燕魯之封其功大也今

臣蒙國重恩三世于今矣正值陛下升平之際
沐浴聖澤潛潤德教可謂厚幸矣而位竊東藩
爵在上列身被輕煖口厭百味目極華靡耳倦
絲竹者爵重祿厚之所致也退念古之受爵祿
者有異于此皆以攻勤濟國輔主惠民今臣無
德可述無功可紀若此終年無益國朝將挂風
人彼已之譏是以上慙玄冕俯愧朱紱方今天
下一統九州晏如顧西尚有違命之蜀東有不
臣之吳使邊境未得稅甲謀士未得高枕者誠

欲混同宇內以致太和也故啟滅有扈而夏功
昭成克商奄而周德著今陛下以聖明統世將
欲卒文武之功繼成康之隆簡良授能以方叔
召虎之臣鎮衛四境爲國爪牙者可謂當矣然
而高鳥未挂於輕繳淵魚未懸於鈎餌者恐鈞
射之術或未盡也昔耿弇不俟光武亟擊張步
言不以賊遺於君父也故車右伏劔於明轂雍
門刎首於齊境若此二子豈惡生而尚死哉誠
忿其慢主而凌君也夫君之寵臣欲以除患興

利臣之事君必殺身靜亂以功報主也昔賈誼
弱冠求試屬國請係單于之頸而制其命終軍
以妙年使越欲得長纓占其王羈致北闕此二
臣者豈好爲夸主而曜世俗哉志或鬱結欲逞
其才力輸能於明君也昔漢武爲霍去病治第
辭曰匈奴未滅臣無以家爲夫憂國忘家捐軀
濟難忠臣之志也今臣居外非不厚也而寢不
安席食不遑味者以二方未尅爲念伏見先帝
武臣宿兵年耆卽世者有聞矣雖賢不乏世宿
將舊卒由習戰也竊不自量志在效命庶立毛
髮之功以報所受之恩若使陛下出不世之詔
效臣錐刀之用使得西屬大將軍當一校之隊
若東屬大司馬統偏師之任必乘危蹈險騁舟
奮驪突刃觸鋒爲士卒先雖未能擒權馘亮庶
將虜其椎率殲其醜類必效涓叟之捷以滅終
身之愧使名挂史筆事列朝榮雖身分蜀境首
懸吳闕猶生之年也如微才弗試沒世無聞徒
榮其軀而豐其體生無益於事死無損於數虛

荷上位而忝重祿禽息鳥視終於白首此徒困
牢之養物非臣之所志也流聞東軍失備師徒
小衄輟食棄餐奮袂攘袵撫劔東顧而心已馳
於吳會矣臣昔從先武皇帝南極赤岸東臨滄
海西望玉門北出玄塞伏見所以行師用兵之
勢可謂神妙矣故兵者不可豫言臨難而制變
者也志欲自効於明時立功於聖世每覽史籍
觀古忠臣義士出一朝之命以徇國家之難身
雖屠裂而功銘著於景鍾名稱垂於竹帛未嘗

不撫心而歎息也臣聞明主使臣不廢有罪故
奔北敗軍之將用而秦魯以成其功絕纓盜馬
之臣赦而楚趙以濟其難臣竊感先帝早崩威
王棄世臣獨何人以堪長久常恐先朝露填溝
壑墳土未乾而身名並滅臣聞騏驥長鳴伯樂
昭其能盧狗悲號韓國知其才是以效之齊楚
之路以逞千里之任試之狡兔之捷以驗搏噬
之用今臣志徇馬之微功竊自惟度終無伯樂
韓國之舉是以於悒而竊自痛者也夫臨博而

企竦聞樂而竊抃者或有賞音而識道也昔毛
遂趙之陪隸猶假錐囊之喻以寤主立功何況
巍巍大魏多士之朝而無慷慨死難之臣乎夫
自銜自媒者士女之醜行也于時求進者道家
之明忌也而臣敢陳聞於陛下者誠與國分形
同氣憂患共之者也冀以塵霧之微補益山海
螢燭末光增輝日月是以敢冒其醜而獻其忠
必知爲朝士所笑聖主不以人廢言伏惟陛下
少垂神聽臣則幸矣

求通親親表

臣植言臣聞天稱其高者以無不覆地稱其廣
者以無不載日月稱其明者以無不照江海稱
其大者以無不容故孔子曰大哉堯之爲君惟
天爲大惟堯則之夫天德於萬物可謂弘廣矣
蓋堯之爲教先親後疎自近及遠其傳曰克明
峻德以親九族九族旣睦平章百姓及周之文
王亦崇厥化其詩曰刑于寡妻至于兄弟以御
于家邦是以雍雍穆穆風人詠之昔周公弔管

蔡之不成廣封懿親以藩屏王室傳曰周之宗盟異姓爲後誠骨肉之恩爽而不離親親之義寔在敦固未有義而後其君仁而遺其親者也惟陛下資帝唐欽明之德體文王翼翼之仁惠洽椒房恩昭九族群臣百僚番休遞上執政不廢於公朝下情得展於私室親理之路通慶弔之情展誠可謂恕已治人推惠施恩者矣至於臣者人道絕緒禁錮明時臣竊自傷也不敢乃望交氣類脩人事叙人倫近且婚媾不通兄弟

未絕吉凶之間塞慶弔之禮廢恩紀之違甚於路人隔閼之異殊於胡越今臣以一切之制永無朝覲之望至於注心皇極結情紫闥神明知之矣然天實爲之謂之何哉退省諸王常有戚戚具爾之心願陛下沛然垂詔使諸國慶問四節得展以叙骨肉之歡恩全怡怡之篤義妃妾之家膏沐之遺歲得再通齊義於貴宗等惠於百司如此則古人之所歎風雅之所詠復存於聖世矣臣伏自惟省無錐刀之用及觀陛下之

所拔授若以臣爲異姓竊自料度不後於朝士
矣若得辭遠遊戴武弁解朱組佩青紱駙馬奏
車趣得一號安宅京室執鞭珥筆出從華蓋入
侍輦轂承答聖問拾遺左右乃臣丹情之至願
不離於夢想者也遠慕鹿鳴君臣之宴中詠棠
棣匪他之誠下思伐木友生之義終懷蓼莪罔
極之哀每四節之會塊然獨處左右唯僕隸所
對惟妻子高談無所與陳發義無所與展未嘗
不聞樂而拊心臨觴而歎息也臣伏以爲犬馬

之誠不能動人譬人之誠不能動天崩城隕霜
臣初信之以臣心况徒虛語耳若葵藿之傾葉
太陽雖不爲之迴光然終向之者誠也臣竊自
比葵藿若降天地之施垂三光之明者寔在陛
下臣聞文子曰不爲福始不爲禍先今之否隔
友于同憂而臣獨唱言者何也竊不願於聖代
使有不蒙施之物有不蒙施之物必有慘毒之
懷故栢舟有天只之怨谷風有棄予之歎伊尹
耻其君不爲堯舜孟子曰不以舜之所以事堯

陳思王集 卷五
事其君者不敬其君者也臣之愚蔽固非虞伊
至於欲使陛下崇光被時雍之美宣緝熙章明
之德者是臣悽悽之誠竊所獨守寔懷鶴立企
佇之心敢復陳聞者冀陛下儻發天聰而垂神
聽也

陳審舉表

臣聞天地協氣而萬物生君臣合德而庶政成
五帝之世非皆智三季之末非皆愚用與不用
知與不知也旣時有舉賢之名而無得賢之實
必各援其類而進矣諺曰相門有相將門有將
夫相者文德昭者也將者武功烈者也文德昭
則可以匡國朝致雍熙稷契夔龍是也武功烈
則可以征不庭威四夷南仲方叔是矣昔伊尹
之爲勝臣至賤也呂尚之處屠釣至陋也及其

見舉於湯武周文誠道合志同玄謨神通豈復
假近習之薦因左右之介哉書曰有不世之君
必能用不世之臣用不世之臣必能立不世之
功殷周二王是矣若夫齷齪近步遵常守故安
足爲陛下言哉故陰陽不和三光不暢官曠無
人庶政不整者三司之責也疆場騷動方隅內
侵沒軍喪衆干戈不息者邊將之憂也豈可虛
荷國寵而不稱其任哉故任益隆者負益重位
益高者責益深書稱無曠庶官詩有職思其憂

此其義也陛下體天真之淑聖登神機以繼統
冀聞康哉之謠偃武行文之美而數年以來水
旱不時民困衣食師徒之發歲歲增調加東有
覆敗之軍西有殪沒之將至使蚌蛤浮翔於淮
泗鼉鼉謹譁於林木臣每念之未嘗不輟食而
揮餐臨觴而搥腕矣昔漢文發代疑朝有變宋
昌曰內有朱虛東牟之親外有齊楚淮南琅邪
此則盤石之宗願王勿疑臣伏惟陛下遠覽姬
文二虢之援中慮周成召畢之輔下存宋昌磐

之固昔騏驥之於吳阪可謂困矣及其伯樂相
之孫郵御之形體不勞而坐取千里蓋伯樂善
御馬明君善御臣伯樂馳千里明君致太平誠
任賢使能之明效也若朝司惟良萬機內理武
將行師方難克弭陛下可得雍容都城何事勞
動鑿駕暴露於邊境哉臣聞羊質虎皮見草則
悅見豺則戰忘其皮之虎也今置將不良有似
於此故語曰患爲之者不知知之者不得爲也
昔樂毅奔趙心不忘燕廉頗在楚思爲趙將臣

生乎亂長乎軍又數承教于武皇帝伏見
用兵之要不必取孫吳而闇與之合竊祿之於
心常願得一奉朝覲排金門踰玉陛列有職之
臣賜須臾之間使臣得一散所懷攄舒蘊積死
不恨矣被鴻臚所下發士息書期會甚急又聞
豹尾已建戎軒駑駕陛下將復勞玉躬擾挂神
思臣誠竦息不遑寧處願得策馬執鞭首當塵
露撮風后之奇接孫吳之要追慕卜商起予左
右效命先驅畢命輪轂雖無大益冀有小補然

天高聽遠情不上通徒獨望青雲而拊心仰高
天而歎息耳屈平曰國有驥而不知乘馬皇皇
而更索昔管蔡放誅周召作弼叔魚陷刑叔向
匡國三監之釁臣自當之二南之輔求不必遠
華宗貴族潘王之中必有應斯舉者故傳曰無
周公之親不得行周公之事唯陛下少留意焉
近者漢氏廣建藩王豐則連城數十約則饗食
祖祭而已未若姬周之樹國五等之品制也若
扶蘇之諫始皇淳于越之難周青臣可謂知時
變矣夫能使天下傾耳注目者當權者是矣故
謀能移主威能懾下豪右執政不在親戚權之
所在雖疏必重勢之所去雖親必輕蓋取齊者
田族非呂宗也分晉者趙魏非姬姓也惟陛下
察之苟吉專其位凶離其患者異姓之臣也欲
國之安祈家之貴存共其榮沒同其禍者公族
之臣也今反公族疏而異姓親臣竊惑焉臣聞
孟子曰君子窮則獨善其身達則兼善天下今
臣與陛下踐冰履炭登山浮澗寒温燥濕高下

共之豈得辭陛下哉不勝憤懣拜表陳情若有不合乞且裁之書府不便滅棄臣死之後事或可思若有濠菴少挂聖意者乞出之朝堂使夫博古之士糾臣表之不合義者如是則臣願足矣

諫取諸國士息表

臣聞古者聖君與日月齊其明四時等其信是以戮凶無重賞善無輕怒若驚霆喜若時雨恩不中絕教無二可以此臨朝則臣下知所死矣受任在萬里之外審主之所以受官必已之所以投命雖有構會之徒泊然不以爲懼者蓋君臣相信之明效也昔章子爲齊將人有告之反者威王曰不然左右曰王何以明之王曰聞章子改葬死母彼尚不欺死父顧當叛生君乎此

君之信臣也昔管仲親射桓公後幽囚從睿檻車載使少年挽而送齊管仲知桓公之必用已懼魯之悔謂少年曰吾爲汝唱汝爲和聲和聲宜走於是管仲唱之少年走而和之日行數百里宿昔而至至則相齊此臣之信君也臣初受封策書曰植受茲青社封於東土以屏翰皇家爲魏藩輔而所得兵百五十人皆年在耳順或不踰矩虎賁官騎及親事凡二百餘人正復不老皆使年壯備有不虞檢校乘城顧不足以自

多况皆復耄耄罷曳乎而名爲魏東藩使屏翰王室臣竊自羞矣就之諸國國有士子合不過五百人伏以爲三軍益損不復賴此方外不定必當須辦者臣願將部曲倍道奔赴夫妻負襁子弟懷糧蹈鋒履刃以徇國難何但習業小兒哉愚誠以揮涕增河懸鼠飲海於朝萬無損益於臣家計甚有廢損又臣士息前後三送兼人已竭惟尚有小兒七八歲已上十六七已還三十餘人今部曲皆年耆卧在牀席非糜不食眼

不能視氣息裁屬者凡三十七人疲瘵風靡沈
盲聾瞶者二十三人惟正須此小兒大者可備
宿衛雖不足以禦寇粗可以警小盜小者未堪
大使爲可使耘鋤穢草驅護烏雀休候人則一
事廢一日獵則衆業散不親自經營則功不攝
常自躬親不委下吏而已陛下聖仁恩詔三至
士子給國長不復發明詔之下有若皦日保金
石之恩必明神之信畫然自固如天如地定習
業者並復見送掩若晝晦悵然失圖伏以爲陛

下旣爵臣百寮之右居藩國之任爲置卿士屋
名爲宮冢名爲陵不使其危居獨立無異於凡
庶若栢成欣於野耕子仲樂於灌園蓬戶茅牖
原憲之宅也陋巷簞瓢顏子之居也臣才不見
效用常慨然執斯志焉若陛下聽臣悉還部曲
罷官屬省監官使解璽釋紱追栢成子仲之業
營顏淵原憲之事居子臧之廬宅延陵之室如
此雖進無成功退有可守身死之日猶松喬也
然伏度國朝終未肯聽臣之若是固當羈絆於

世繩維繫於祿位懷屑屑之小憂執無已之百
念安得蕩然肆志逍遙於宇宙之外哉此願未
從陛下必欲崇親親篤骨肉潤白骨而榮枯木
者惟遂仁德以副前思

諫伐遼東表

臣伏以遼東負阻之國勢便形固帶以遼海今
輕車遠攻師疲力屈彼有其備所謂以逸待勞
以飽制饑者也以臣觀之誠未易攻也若國家
攻之而必克屠襄平之城懸公孫之首得其地
不足以償中國之費虜其民不足以補三軍之
失是我所獲不如所喪也若其不拔曠日持久
暴師於野然天時不測水濕無常彼我之兵連
於城下進則有高城深池無所施其功退則有

歸途不通道路濺沕東有待釁之吳西有何隙
之蜀吳起東南則荆楊騷動蜀應西境則雍涼
三分兵不解於外民罷困于內促耕不解其饑
疾蠶不救其寒夫渴而後穿井饑而後殖種可
以圖遠難以應卒也臣以爲當今之務在於省
徭役薄賦歛勤農桑三者旣備然後令伊管之
臣得施其術孫吳之將得奮其力若此則太平
之基可立而待康哉之歌可坐而聞曾何憂於
二敵何懼於公孫乎今不息邦畿之內而勞神
於蠻貊之域竊爲陛下不取也

陳思王集卷之六

魏陳思王曹植子建著

表

慶文帝受禪表

陛下以聖德龍飛順天革命允答神符誕作民
主乃祖先后積德累仁世濟其美以暨於先王
勤恤民隱劬勞戮力以除其害經營四方不遑
啟處是用隆茲福慶光啟于魏陛下承統贊成
前緒克廣德音綏靜內外紹先周之舊跡襲文

陳思王集 卷六
武之懿德保大定功海內爲一豈不休哉

慶受禪上禮表

陛下以明聖之德受天顯命良辰卽祚以臨天下
洪化宣流洋溢宇內是以普天率土莫不承
風欣慶執贄奔走奉賀闕下况臣親體至戚懷
歡踊躍

龍見賀表

臣聞鳳凰復見於鄴南黃龍雙出於清泉聖德
至理以致嘉瑞將棲鳳於林囿豢龍於陂池爲
百姓旦夕之所觀

初封安鄉侯表

臣抱罪卽道憂惶恐怖不知刑罪當所限齊陛
下哀愍臣身不聽有司所執待之過厚卽日於
延津受安鄉侯印綬奉詔之日且懼且悲懼於
不脩始違憲法悲於不慎速此貶退上增陛下
垂念下遺太后見憂臣自知罪深責重受恩無
量精魄飛散忘軀殞命

封甄城王謝表

臣愚駑垢穢才質疵下過受陛下日月之恩不能摧身碎首以答陛下厚德而狂悖發露始干天憲自分放棄抱罪終身苟貪視息無復晷幸不悟聖恩爵以非望枯木生葉白骨更肉非臣罪戾所當宜蒙俯仰慙惶五內戰悸奉詔之日悲喜參至雖因拜章陳答聖恩下情未展

轉封東阿王謝表

奉詔太皇太后念雍丘下濕少桑欲轉東阿當合王意可遣人按行知可居不奉詔之日伏增悲喜臣以無功虛荷國恩爵尊祿厚用無益於時脂車秣馬志在黜放不圖陛下天父之恩猥宣皇太后慈母之念遷之陛下幸爲久長計聖旨惻隱恩過天地臣在雍丘劬勞五年左右罷怠居業向定園果萬株枝條始茂私情區區實所重棄然桑田無業左右貧窶食裁糊口形有

陳思王集 卷六 四
裸露臣聞古之仁君必有棄國以爲百姓况乃
轉居沃土人從蒙福江海所流無地不潤雲雨
所加無物不茂若陛下念臣入從五年之勤少
見佐助此枯木生華白骨更肉非臣之敢望也
饑者易食寒者易衣臣之謂矣

謝妻改封陳妃表

璽書今以東阿王妃爲陳王妃并下印綬因故
上前所假印以其拜授書以卽日到臣輒奉詔
拜其才質底下謬同受私遇寵素餐臣爲其首
陛下體乾坤育物之德東海含容之大乃復隨
例顯封大國光揚章灼非臣負薪之才所宜克
當非臣穢釁所宜蒙獲夙夜憂歎念報罔極洪
施遂隆旣榮枝榦猥復正臣妃爲陳妃光耀宣
朗非妾婦蠢愚所當蒙被葵藿草物猶感恩養

况臣含氣銜珮弘惠歿而後已誠非翰墨屢辭所能報答

謝入覲表

臣得出幽屏之城獲覲百官之美此一喜也昔
茅茨之陋登閭闔之闔此二喜也必以有覲之
容瞻見穆穆之顏此三喜也將以禱杙之質稟
受崇聖之訓此四喜也

又

不世之命非所致思有若披浮雲而覩白日出
幽谷而登喬木目希庭燎心存泰極

謝周觀表

詔使周觀初玩雲盤北觀疏圃遂步九華神明
特處譎詭天然誠可謂帝室皇居者矣雖崑崙
閩風之麗文昌之居不是過也

謝明帝賜食表

近得賜御食拜表謝恩尋奉手詔愍臣瘦弱奉
詔之日涕泣橫流雖文武二帝所以愍憐於臣
不復過於明詔

明帝詔附

王顏色瘦弱何意耶腹中調和不今者食幾
許米又啖肉多少見王瘦吾甚驚宜當節水
加餐

謝賜柰表

卽夕殿中虎賁宣詔賜臣等冬柰一奩詔賜使
溫啖夜非食時而賜見及柰以夏熟今則冬至
物以非時爲珍恩以絕口爲厚非臣等所宜荷
之

帝答詔附

山柰從涼州來道里旣遠又東來轉暖故柰
中變色不佳耳

謝鼓吹表

許以簫管之樂榮以田游之嬉陛下仁重存虞
思過周日濟世安宗實在聖德

答明帝詔表

奉詔所作故平原公主誄文義相扶章章殊興
句句感切

上責躬詩

臣植言臣自抱釁歸蕃刻肌刻骨追思罪戾晝
分而食夜分而寢誠以天網不可重罹聖恩難
可再恃切感相鼠之篇無禮遄死之義形影相
弔五情愧赧以罪棄生則違古賢夕改之勸恐
垢苟全則犯詩人胡顏之譏伏惟陛下德象天
地恩隆父母施暢春風澤如時雨是以不別荆
棘者慶雲之惠也七子均養者鳴鳩之仁也舍
罪責功者明君之舉也矜愚愛能者慈父之恩

也是以愚臣徘徊於恩澤而不敢自棄者也前
奉詔書臣等絕朝心離志絕自分黃耆未無執
圭之望不圖聖詔猥垂齒召至止之日馳心輦
轂僻處西館未奉闕庭踊躍之懷瞻望反側不
勝犬馬戀主之情謹拜表并獻詩二首詞旨淺
末不足採覽貴露下情冒顏以聞

上卞太后誄表

大行皇太后資坤元之性體載物之仁齊美姜
嫄等德任姒佐政內朝惠加四海草木荷恩含
氣受潤庶鍾元吉承育萬祚何圖一旦早棄明
朝背絕臣庶悲痛靡告臣聞銘以述德誄尚及
哀是以冒越諒闇之禮作誄一篇知不足讚揚
明貴以展臣蓼莪之思憂荒情散不足觀采

上先帝賜鎧表

先帝賜臣鎧黑光明光各一領兩當鎧一領今
代以昇平兵革無事乞悉以付鎧曹自理

冬至獻襪履表

伏見舊儀國家冬至獻履貢襪所以迎福踐長
先臣或爲之頌臣旣玩其嘉藻願述朝慶千載
昌期一陽嘉節四方交泰萬彙昭蘇亞歲迎祥
履長納慶不勝感節情繫帷幄拜表奉賀并獻
紋履七量襪若干副茅茨之陋不足以入金門
登玉臺也

獻璧表

臣聞玉不隱瑕臣不隱情伏知所進非和氏之璞萬國之幣璧爲克貢

獻馬表

臣於先武皇帝世得大宛紫鱗一疋形法應圖善持頭尾教令習拜今輒已能又能行與鼓節相應謹以表奉獻

獻牛表

臣聞物以洪珍細亦或貴故不見僬僥之微不知泱泱之泰不見果下之乘不別龍馬之大高下相懸所以致觀也謹奉牛一頭不足追遵大小之制形少有殊敢不獻上

請招降江東表

臣聞士之羨永生者非徒以甘食麗服宰割萬物而已將有以補益群生尊主惠民使功存於竹帛名光於後嗣今臣文不昭於俎豆武不習於干戈而竊位藩王施祿東夏消損天日無益聖朝淮南尚有山竄之賊吳會猶有潛江之虜使戰士未獲歸於農畝五兵未得收於武庫蓋善論者不耻謝善戰者不羞走夫凌雲者泥蟠者也後伸者先屈者也是以神龍以爲德尺蠖

以昭義昔湯事葛文王事犬夷固仁者能以大
 事小若陛下遣明哲之使繼能陸賈之蹤者使
 之江南發愷悌之詔張日月之信開以降路權
 必奉承聖化斯不疑也

請用賢表

舊集割裂審舉表蒙此之前
 名曰又請自試表今正之

昔段干木脩德於閭閻秦師為之輟攻而文侯
 以安穰苴授節於邦境燕晉為之退師而景公
 無患皆簡德尊賢之所致也願陛下垂高宗傳
 巖之明以顯中興之功

望恩表

臣聞寒者不貪尺玉而思短褐饑者不願千金而美一餐夫千金尺玉至貴而不若一餐短褐者物有所急也

請祭先王表

自計遼遠以來有踰旬日垂竟夏節方到臣悲傷有心先王公夏至日終是以家俗不以夏日祭至于先王自可以今辰告祠臣雖卑鄙實稟體于先王自臣雖貧窶蒙陛下厚賜足供大平之具臣欲祭先王于北河之上羊猪牛臣能自辨者臣縣自有先王喜鰻臣前以表得徐州臧霸二鰻百枚足自供事請水瓜五枚計先王崩來未能半歲臣實欲告敬且欲復盡哀

請赴元正表

欣豫百官之美想見朝覲之禮耳存九成目想
率舞

章

改封陳王謝章

臣既弊陋守國無効自分削黜以彰衆議不意
天恩滂霈潤澤橫流猥蒙加封茅土既優爵賞
必重非臣虛淺所宜奉受非臣灰身所能報答

陳思王集卷六 十六
封二子爲公謝恩章

詔書封臣息男苗爲高陽鄉公志爲穆鄉公臣
伏自惟文無升堂廟勝之功武無摧鋒接刃之
効天時運幸得生貴門遇以親戚少荷光寵竊
位列侯榮曜當世顧影慙形流汗反側洪恩罔
極雲雨增加旣榮本榦枝葉并蒙苗志小豎旣
頑且稚猥荷列爵竝佩金紫施崇所加惠及父
子

陳思王集卷之七

魏陳思王曹植子建著

書

與楊德祖書

植白數日不見思子爲勞想同之也僕少小好
爲文章迄至于今二十有五年矣然今世作者
可略而言也昔仲宣獨步於漢南孔璋鷹揚於
河朔偉長擅名於青土公幹振藻於海隅德璉
發跡於北魏足下高視於上京當此之時人人

自謂握靈蛇之珠家家自謂抱荆山之玉吾王於是設天網以該之頓八紘以掩之今悉集茲國矣然此數子猶復不能飛騫絕跡一舉千里也以孔璋之才不閑於辭賦而多自謂能與司馬長卿同風譬畫虎不成反爲狗者也前有書嘲之反作論盛道僕讚其丈夫鍾期不失聽於今稱之吾亦不能妄歎者畏後世之嗤余也世人著述不能無病僕常好人譏彈其文有不善者應時改定昔丁敬禮嘗作小文使僕潤飾之

僕自以才不過若人辭不爲也敬禮謂僕卿何所疑難文之佳惡吾自得之後世誰相知定吾文者邪吾常歎此達言以爲美談昔尼父之文辭與人通流至於制春秋游夏之徒乃不能措一辭過此而言不病者吾未之見也蓋有南威之容乃可以論於淑媛有龍淵之利乃可以議於斷割劉季緒才不能逮於作者而好詆訶文章倚捩利病昔田巴毀五帝罪三王訾五霸於稷下一旦而服千人魯連一說使終身杜口劉

生之辯未若田氏今之仲連求之不難可無歎
息乎人各有好尚蘭茝蓀蕙之芳衆人之所好
而海畔有逐臭之夫咸池六莖之粝衆人所共
樂而墨翟有非之之論豈可同哉今往僕少小
所著辭賦一通相與夫街談巷說必有可采擊
轅之歌有應風雅匹夫之思未易輕棄也辭賦
小道固未足以揄揚大義彰示來世也昔揚子
雲先朝執戟之臣耳猶稱壯夫不爲也吾雖薄
德位爲蕃侯猶庶幾戮力上國流惠下民建永
世之業流金石之功豈徒以翰墨爲勳績辭賦
爲君子哉若吾志未果吾道不行則將採庶官
之實錄辯時俗之得失定仁義之衷成一家之
言雖未能藏之於名山將以傳之於同好非要
之皓首豈以今日之論乎其言之不慙恃惠子
之知我也明早相迎書不盡懷曹植白

楊脩答臨淄侯牋附

脩死罪不待數日若彌年載豈獨愛顧之隆
使係仰之情深耶損辱嘉命蔚矣其文誦讀

反覆雖諷雅頌不復過此若仲宣之擅江表
陳氏之跨冀域徐劉之顯青豫應生之發魏
國斯皆然矣至於脩者聽采風聲仰德不暇
日周章於省覽何惶駭於高視哉伏惟君侯
少長貴盛體發旦之質有聖善之教遠近觀
者徒謂能宣昭懿德光贊大業而已不謂復
能兼覽傳記留思文章今乃含王超陳度越
數子觀者駭視而拭目聽者傾首而聳耳非
夫體通性達受之自然其孰能至於此乎又

嘗親見執事握牘持筆有所造作若成誦在
心借書於手曾不斯須少留思慮仲尼日月
無得踰焉脩之仰望殆如此矣是以對鵲而
辭作暑賦彌日而不獻見西施之容歸憎其
貌者也伏想執事不知其然猥受顧錫教使
刊定春秋之成莫能損益呂氏淮南字值千
金然而弟子戟口市人拱手者賢聖卓犖固
所以殊絕凡庸也今之賦頌古詩之流不更
孔公風雅無別耳脩家子雲老不曉事彊著

一書悔其少作若此仲山周旦之徒則爲皆有僭乎君侯忘聖賢之顯迹述鄙宗之過言竊以爲未之思也若乃不忘經國之大美流千載之英聲銘功景鐘書名竹帛此自雅量素所蓄也豈與文章相妨害哉輒受所惠竊備矇瞍歌誦而已敢望惠施以忝莊氏季緒瓌瓌何足以云反答造次不能宣備脩死罪死罪

與吳質書

植白季重足下前日雖因常調得爲密坐雖讌飲彌日其於別遠會稀猶不盡其勞積也若夫觴酌陵波於前簫笳發音於後足下鷹揚其體鳳觀虎視謂蕭曹不足儔衛霍不足侔也左顧右盼謂若無人豈非君子壯志哉過屠門而大嚼雖不得肉貴且快意當斯之時願舉泰山以爲肉傾東海以爲酒伐雲夢之竹以爲笛斬泗濱之梓以爲箏食若填巨壑飲若灌漏卮其樂

固難量豈非大丈夫之樂哉然日不我與曜靈
急節面有逸景之速別有參商之濶思欲抑六
龍之首頓羲和之轡折若木之華閉濛汜之谷
天路高邈良無由緣懷戀反側如何如何得所
來訊文采委曲擘若春榮瀏若清風申詠反覆
曠若復面其諸賢所著文章想還所治復申詠
之也可令熹事小史諷而誦之夫文章之難非
獨今也古之君子猶亦病諸家有千里驥而不
珍焉人懷盈尺和氏而無貴矣夫君子而不知
音樂古之達論謂之通而蔽墨翟不好伎何爲
過朝歌而迴車乎足下好伎而正值墨氏迴車
之縣想足下助我張目也又聞足下在彼自有
佳政夫求而不得者日有之矣未有不求而自
得者也且改轍易行非良樂之御易民而治非
楚鄭之政願足下勉之而已矣適對嘉賓口授
不悉往來數相聞曹植白

吳質答東阿王書附

質白信到奉所惠貺發函伸紙是何文采之

巨麗而慰喻之綢繆乎夫登東嶽者然後知衆山之邈迤也奉至尊者然後知百里之卑微也自旋之初伏念五六日至于旬時精散思越惘若有失非敢羨寵光之休慕倚頓之富也誠以身賤犬馬德輕鴻毛至乃歷玄闕排金門升玉堂伏虛檻於前殿臨曲池而行觴旣威儀虧替言辭漏渫雖恃平原養士之懿愧無毛遂燿穎之才深蒙薛公折節之禮而無馮諼三窟之效屢獲信陵虛左之德又無侯生可述之美凡此數者乃質之所以憤積於胸臆懷眷而惜邑者也若追前宴謂之未究欲傾海爲酒弁山爲肴伐竹雲夢斬梓泗濱然後極雅意盡歡情信公子之壯觀非鄙人之所庶幾也若質之志實在所天思投印釋黻朝夕侍坐鑽仲父之遺訓覽老氏之要言對清醕而不酌抑嘉肴而不享使西施出帷嫫母侍側斯盛德之所蹈明哲之所保也若乃近者之觀實蕩鄙心秦箏發徽二八

迭奏填簫激於華屋靈鼓動於座右耳嘈嘈
而無聞情踴躍於鞍馬謂可北懾肅慎使貢
其楛矢南震百越使獻其白雉又况權備夫
何足視乎還治諷采所著觀省英瑋實賦頌
之宗作者之師表也衆賢所述亦各有志昔
趙武過鄭七子賦詩春秋載列以爲美談質
小人也無以承命又所答貺辭醜義陋申之
再三赧然汗下此邦之人閑習辭賦三事大
夫莫不諷誦何但小史之有乎重惠苦言訓
以政事惻隱之恩形乎文墨墨子迴車而質
四年雖無德與民式歌且舞儒墨不同固以
久矣然一旅之衆不足以揚名步武之間不
足以騁跡若不改轍易御將何以效其力哉
今處此而求大功猶絆良驥之足而責以千
里之任檻猿猴之勢而望其巧捷之能者也
不勝見恤謹附遣白答不敢繁辭吳質白

里之計盡對新之機而望其西安之計也
今或出而未大以節其身觀之民之計也
吳以黜禍若不知辯易斷辭可以致其功
夫矣然一旅之衆不足以勝之步大之間亦
四羊據無與吳另左福且我謂聖不同國
以迎事則對之恩汎平文武思聖子張車而實

與司馬仲達書

今賊徒欲保江表之城守區區之吳爾無有爭
雄於宇內角勝於平原之志也故其俗蓋以洲
渚爲營壁江淮爲城塹而已若可得挑致則吾
一旅之卒足以敵之矣蓋弋鳥者矯其矢釣魚
者理其綸此皆度彼爲慮因象設宜者也今足
下曾無矯矢理綸之謀徒欲候其離舟伺其登
陸乃圖并吳會之地收陳野之民恐非主上授
節將軍之心也

與陳琳書

夫披翠雲以爲衣戴北斗以爲冠帶虹蜺以爲
紳連日月以爲佩此服非其美也然而帝王不
服者望殊於天志絕於心矣

與丁敬禮書

頃不相聞覆相聲音亦爲怪故瘞與爲書含欣
而秉筆大笑而吐辭亦歡之極也

答崔文始書

臨江直釣不獲一鱗非江魚之不食其所餌之者非也是以君子慎舉擢

序

前錄自序

故君子之作也儼乎若高山勃乎若浮雲質素也如秋蓬摛藻也如春葩汜乎洋洋光乎皜皜與雅頌爭流可也余少而好賦其所尚也雅好慷慨所著繁多雖觸類而作然蕪穢者衆故剛定別撰爲前錄七十八篇

柳頌序

予以閑暇駕言出遊過友人楊德祖之家視其屋宇寥廓庭中有一柳樹聊戲荊其枝葉故著斯文表之遺翰遂因辭勢以譏當今之士

七遷都賦序

余初封平原轉出臨淄中命鄆城遂徙雍立改邑浚儀而末將適于東阿號則六易居實三遷連遇瘠土衣食不繼

王粲作焉

與世辭士亦食不繼

呂氏辭而未繼遊于東阿謝與六月易試實二
數
余時桂平與韓昌高深中命渡無終與家立如
數藩與有

七

七啟

昔枚乘作七發傅毅作七激張衡作七辯崔駰
作七依辭各美麗予有慕之焉遂作七啟并命
王粲作焉

玄微子隱居大荒之庭飛遯離俗澄神定靈輕
祿傲貴與物無營耽虛好靜羨此永生獨馳思
乎天雲之際無物象而能傾於是鏡機子聞而
將往說焉駕超野之駟乘追風之輿經迥漠出

幽墟入乎泱泱之野遂屈玄微子之所居其居也左激水右高岑背洞壑對芳林冠皮弁被文裘出山岫之潛穴倚峻崖而嬉游志飄飄焉羗羗焉似若狹六合而隘九州若將飛而未逝若舉翼而中流於是鏡機子攀葛藟而登距岳而立順風而稱曰予聞君子不遯俗而遺名智士不背世而滅勳今吾子棄道藝之華遺仁義之英耗精神乎虛廓廢人事之紀經譬若畫形於無象造響於無聲未之思乎何所規之不通也

玄微子俯而應之曰嘻有是言乎夫太極之初混沌未分萬物紛錯與道俱隆蓋有形必朽有跡必窮茫茫元氣誰知其終名穢我身位累我躬竊慕古人之所志仰老莊之遺風假靈龜以托喻寧掉尾於塗中

鏡機子曰夫辯言之艷能使窮澤生流枯木發榮庶感靈而激神况近在乎人情僕將爲君子說游觀之至娛演聲色之妖靡論變化之至妙敷道德之弘麗願聞之乎玄微子曰吾子整身

倦世探隱拯沈不遠遐路幸見光臨將敬滌耳
以聽玉音

鏡機子曰芳菰精粃霜蓄露葵玄熊素膚肥豢
膿肌蟬翼之割剖纖析微累如疊穀離若散雪
輕隨風飛刃不轉切山鷄斥鷃珠翠之珍奉芳
蓮之巢龜膾西海之飛鱗臠江東之潛鼉臠漢
南之鳴鶉糝以芳酸甘和既醇玄冥適鹹蓐收
調辛紫蘭丹椒施和必節滋味既殊遺芳射越
乃有春清縹酒康狄所營應化則變感氣而成
彈徵則苦發扣宮則甘生於是盛以翠樽酌以
雕觴浮蟻鼎沸酷烈馨香可以和神可以娛腸
此肴饌之妙也子能從我而食之乎玄微子曰
予其藜藿未暇此食也

鏡機子曰步光之劍華藻繁縟飾以文犀雕以
翠綠綴以驪龍之珠錯以荆山之玉陸斷犀象
未足稱雋隨波截鴻水不漸刃九旒之冕散曜
垂文華組之纓從風紛紜佩則結綠懸黎寶之
妙微符采照爛流景揚輝黼黻之服紗縠之裳

金華之鳥動趾遺光繁飾參差微鮮若霜緝佩
綢繆或彫或錯薰以幽若流芳肆布雍容閒步
周旋馳曜南威爲之解顏西施爲之巧笑此容
飾之妙也子能從我而服之乎玄微子曰予好
毛褐未暇此服也

鏡機子曰馳騁足用蕩思游獵可以娛情僕將
爲吾子駕雲龍之飛駟飾玉輅之繁纓垂宛虹
之長綏抗招搖之華旂插忘歸之矢乘繁弱之
弓忽躡景而輕驚逸奔驥而超遺風於是礮填

谷塞榛藪平夷綠山置且彌野張罟下無漏跡
上無逸飛鳥集獸屯然後會圍獠徒雲布武騎
霧散丹旗耀野戈爰皓肝曳文狐掩狡兎捐鷓
鷄拂振鷺當軌見藉值足遇踐飛軒電逝獸隨
輪轉翼不暇張足不及騰動觸飛鋒舉挂輕冒
搜林索險探薄窮阻騰山赴壑風厲焱舉機不
虛發中必飲羽於是人稠網密地逼勢脇哮闕
之獸張牙奮鬣志在觸突猛氣不懼乃使北宮
東郭之儔生抽豹尾分裂羶肩形不抗手骨不

隱拳批熊碎掌拉虎摧斑野無毛顛林無羽群
積獸如陵飛翮成雲於是駮鐘鳴鼓收旌弛旆
頓綱縱網罷獠回邁駿馱齊驤揚鑿飛沫俯倚
金較仰撫翠蓋雍容暇豫娛志方外此羽獵之
妙也子能從我而觀之乎玄微子曰予性樂恬
靜未暇此觀也

鏡機子曰閒宮顯敞雲屋皓旰崇景山之高基
迎清風而立觀彤軒紫柱文棖華梁綺井含葩
金墀玉廂溫房則冬服絺絺清室則中夏含霜
華閣綠雲飛陛凌虛俯眺流星仰觀八隅升龍
攀而不逮眇天際而高居繁巧神怪變名異形
班輸無所措其斧斤離婁爲之失睛麗草交植
殊品詭顛綠葉朱榮熙天曜日素水盈沼叢木
成林飛翮陵高鱗甲隱深於是逍遙暇豫忽若
忘歸乃使任子垂釣魏氏發機芳餌沉水輕繳
弋飛落翳雲之翔鳥援九淵之靈龜然後採菱
華擢水蘋弄蛛蟀戲鮫人諷漢廣之所詠觀游
女於水濱耀神景於中沚被輕縠之織羅遺芳

烈而靜步抗皓手而清歌歌曰望雲際今有好
仇天路長今往無由佩蘭蕙今爲誰脩嫵婉絕
兮我心愁此宮館之妙也子能從我而居之乎
玄微子曰予耽巖穴未暇此居也

鏡機子曰旣游觀中原逍遙開宮情放志蕩滯
樂未終亦將有才人妙妓遺世越俗揚北里之
流聲紹陽阿之妙曲爾乃御文軒臨洞庭琴瑟
交揮左箎右笙鐘鼓俱振簫管齊鳴然後妓人
乃被文縠之華桂振輕綺之飄颻戴金搖之熠
燿揚翠羽之雙翹揮流芳耀飛文歷盤鼓煥續
紛長裾隨風悲歌入雲躡捷若飛蹈虛遠躡陵
躍超驤蜿蟬揮霍翔爾鴻翥泚然鳧沒縱輕體
以迅赴景追形而不逮飛聲激塵依違厲響才
捷若神形難爲象於是爲歡未溲白日西頽散
樂變飾微步中閨玄眉弛兮鉛華落收亂髮兮
拂蘭澤形嬌服兮揚幽若紅顏宜笑睇盼流光
時與吾子携手同行踐飛除卽聞房華燭爛幄
幕張動朱唇發清商揚羅袂振華裳九秋之夕

爲歡未央此聲色之妙也子能從我而遊之乎
玄微子曰予願清虛未暇此遊也

鏡機子曰予聞君子樂奮節以顯義烈士其危
軀以成仁是以雄俊之徒交黨結倫重氣輕命
感分遺身故田光伏劒於北燕公叔畢命於西
秦果毅輕斷虎步谷風威懼萬乘華夏稱雄詞
未及終而玄微子曰善鏡機子曰此乃游俠之
徒耳未足稱妙也若夫田文無忌之儔乃上古
之俊公子也皆飛仁揚義騰躍道藝遊心無方
抗志雲際陵轢諸侯驅馳當世揮袂則九野生
風慷慨則氣成虹蜺吾子若當此之時能從我
而友之乎玄微子曰予亮願焉然方於大道有
累如何

鏡機子曰世有聖宰翼帝霸世同量乾坤等曜
日月玄化參神與靈合契惠澤播於黎苗威靈
振乎無外超隆平於殷周踵羲皇而齊泰顯朝
惟清王道遐均民望如草我澤如春河濱無洗
耳之士喬嶽無巢居之民是以俊乂來仕觀國

之光舉不遺材進各異方讚典禮於辟雍講文
德於明堂正流俗之華說綜孔氏之舊章散樂
移風國富民康神應休臻屢獲嘉祥故甘露紛
而晨降景星宵而舒光觀游龍於神淵聆鳴鳳
於高岡此霸道之至隆而雍熙之盛際然主上
猶尚以沈恩之未廣懼聲教之未厲采英奇於
仄陋宣皇明於巖穴此甯子商歌之秋而呂望
所以投綸而逝也吾子爲太和之民不欲仕陶
唐之世乎於是玄微子攘袂而興曰偉哉言乎
近者吾子所述華淫欲以厲我祇攬予心至聞
天下穆清明君莅國覽盈虛之正義知頑素之
迷惑令予廓爾身輕若飛願反初服從子而歸

魏德論

元氣否塞玄黃噴薄

滄海崩騰

乾坤倒置

日月無光

皇天降災

地獄開門

萬民塗炭

九鼎沉淪

而晨降景星宵... 於高岡此霸道之... 猶尚以沈思之未... 悉烈令于... 天不默肅... 設者吾子...

陳思王集卷之八

魏陳思王曹植子建著

論

魏德論

元氣否塞玄黃噴薄辰星亂逆陰陽舛錯四海
鼎沸蕭條沙漠武皇之興也以道陵殘義氣風
發神戈退指則妖氛順制靈旗一舉則朝陽播
越惟我聖后神武蓋天威光佐掃辰彗北蠻首
尾爭擊氣齊率然乃電北席卷千里隱乎若崩

嶽肝乎若潰海愠彼蠻夏蠢爾弗恭脂我蕭斧
簡武練鋒星陳而天運振耀乎南封荆人風靡
交益影從軍蘊餘勢襲利乘權蕩鬼區於白水
摘矯制乎遐川仰屬日於條支晞弱水之潺湲
薄張騫於大夏笑驃騎於祁連其化之也如神
其養之也如春柔遠能邇誰敢不賓憲度增飾
日曜月光跡存乎建安道隆乎延康於是漢氏
歸義顧音孔昭顯禪天位希唐效堯上猶謙謙
弗納也發不世之明詔薄皇居而弗泰蹈北人

之清節美石戶之高介義貫金石神明已與神
祇致祥乾靈効祐於是群公卿士功臣列辟率
爾而進曰昔文王三分居二以服事殷非能之
而弗欲蓋欲之而弗能况天網弗禁皇綱圮紐
侯民非復漢萌尺土非復漢有故武皇創迹於
前陛下光美於後蓋所謂勳成於彼位定於此
者也將使斯民播秬鬯植靈芝鋤岐穗挹醴滋
遂乃凱風回焱甘露匝時農夫詠於田隴織婦
欣而綜絲黃吻之齒含哺而怡鮐背之老擊壤

而嬉古雖稱乎赫胥曷若斯之大治乎于時上
富於春秋聖德汪穢竒志妙思神鑒靈察方將
審御陰陽爭耀日月極禎祥於遐奧飛仁風以
樹惠旣游精於萬機探幽洞深復逍遙乎六藝
兼覽儒林抗思乎文藻之場囿容與乎道術之
疆畔超天路而高峙階清雲以妙觀將參跡於
三皇豈徒論功於大漢天地位矣九域清矣皇
化四達帝猷成矣明哉元首股肱貞矣禮樂旣
作興頌聲矣固封泰山禪梁甫歷名山以祈福
周五方之靈宇越八九於往素踵帝王之靈矩
流餘祚於黎丞鍾元吉乎聖主

魏德謳

穀

於穆聖皇仁暢惠渥辭獻減膳以服鰥獨和氣
致祥時雨滲漉野草萌芽變化嘉穀

禾

猗猗嘉禾惟穀之精其洪盈箱協穗殊莖昔生
周朝今植魏庭獻之廟堂以照祖靈

鵲

鵲之疆疆詩人取喻今存聖世呈質見素饑食
茗華渴飲清露異於儔足衆鳥是鶩

鳩

班班者鳩爰素其質昔翔殷邦今爲魏出朱目
丹趾靈姿詭顛載飛載鳴彰我皇懿

漢二祖優劣論

有客問予曰夫漢二帝高祖光武俱爲授命撥
亂之君比時事之難易論其人之優劣孰者爲
先予應之曰昔漢之初興高祖因暴秦而起遂
誅強楚光有天下功齊湯武業流後嗣誠帝王
之元勳人君之盛事也然而名不繼德行不純
道身歿之後崩亡之際果令凶婦肆醜酷之心
嬖妾被人豕之刑亡趙幽囚禍殃骨肉諸呂專
權社稷幾移凡此諸事豈非高祖寡計淺慮以

致然彼之雄材大略倣儻之節信當世至豪傑
壯傑士也又其梟將畫臣皆古今之鮮有歷世
之希覩彼能任其才而用之聽其言而察之故
兼天下有帝位流巨勲而遺元功也世祖體乾
靈之休德稟貞和之純精通黃中之妙理蹈亞
聖之懿才其爲德也通達而多識仁智而明恕
重慎而周密樂施而愛人值陽九無妄之世遭
炎光厄會之運殷爾雷發赫然神舉用武略以
襍暴興義兵以掃殘神光前驅威風先逝軍未
出於南京莽已斃於西都夫其蕩滌凶穢勦除
醜類若順迅風而縱烈火曬白日而掃朝雲也
爾乃廟勝而後動衆計定而後行師故攻無不
陷之壘戰無奔北之卒是以群下欣欣歸心聖
德宣仁以和衆邁德以來遠故寶融聞聲而影
附馬援一見而歎息股肱有濟濟之美元首有
穆穆之容敦睦九族有唐虞之稱高尚純樸有
羲皇之素謙虛納下有吐握之勞留心庶事有
日昃之勤乃規弘跡而造皇極創帝道而立德

基是以計功則業殊比隆則事異旌德則靡愆
言行則無穢量力則勢微論輔則力劣卒能握
乾坤之休徵應五百之顯期立不刊之遐迹建
不朽之元功金石播其休烈詩書載其勲懿故
曰光武其優也

成王漢昭論

周公以天下初定武王既終而成王尚幼未能
定南面之事是以推以忠誠稱制假號二弟流
言召公疑之發金縢之匱然後用審亦未決也
至於昭帝所以不疑於霍光亦緣武帝有遺詔
於光使光若周公踐天子之位行周公之事吾
恐叛者非徒二弟疑者非徒召公也且賢者固
不能知聖賢自其宜耳昭帝固可不疑霍光周
王自疑周公也若以昭帝勝成王霍光當踰周

公耶若以堯舜爲成王湯禹作管蔡邵公周公
之不見疑必也

相論

世固有人身瘠而志立體小而名高者於聖則
否是以堯眉八彩舜目重瞳禹耳參漏文王四
乳然則世亦有四乳者此則駑馬一毛似驥耳
宋臣有公孫呂者長七尺面長三尺廣三寸若
此之狀蓋遠代而求非一世之異也使形殊於
外道合其中名震天下不亦宜乎語云無憂而
戚憂必及之無慶而歡樂必隨之此心有先動
而神有先知則色有先見也故扁鵲見桓公知

其將亡申叔見巫臣知其竊妻而逃也

辯道論

世有方士吾王悉所招致其陵有其始廬江有左慈陽城有郤儉始能行氣導引慈曉房中之術儉善辟穀悉號三百歲卒所以集之於魏國者誠恐斯人之徒接姦宄以欺衆行妖慝以惑民豈復欲觀神仙於瀛洲求安期於海島釋金輅而履雲輿棄六驥而美飛龍哉自家王與太子及余兄弟咸以爲調笑不信之矣然始等知上遇之有恒奉不過於員吏賞不加於無功海

島難得而游六轍難得而佩終不敢進虛誕之言出非常之語余嘗試卻儉絕穀百日躬與之寢處行步起居自若也夫人不食七日則死而儉乃如是然不必益壽可以療疾而不憚饑饉焉左慈善脩房內之術差可終命然自非有志至精莫能行也其始者老而有少容自諸術士咸共歸之然始辭繁寡實頗有怪言余常辟左右獨與之談問其所行溫顏以誘之美辭以導之始語余吾本師姓韓字世雄嘗與師於南海作金前後數四投數萬斤金於海又言諸梁時西城胡來獻香罽罽帶割玉刀時悔不取也又言車師之西國兒生擘背出脾欲其食少而孛行也又言取鯉魚五寸一雙合其一煮藥俱投沸膏中有藥者奮尾鼓鰓游行沉浮有若處淵其一者已熟而可噉余時問言率可試不言是藥去此逾萬里當出塞始不自行不能得也言不盡於此頗難悉載故粗舉其巨怪者始若遭秦始皇漢武帝則復爲徐市欒大之徒也夫帝

者位殊萬國富有天下威尊彰明齊光日月宮
殿闕庭等曜紫微何顧乎王母之宮崑崙之域
哉夫三鳥備役不如百官之美也素女姮娥不
若椒房之麗也雲衣羽裳不若黼黻之飾也駕
螭載霓不若乘輿之盛也瓊藥玉華不若玉圭
之潔也而顧爲匹夫所囿納虛妄之辭信眩惑
之說隆禮以招弗臣傾產以供虛求散王爵以
榮之清閒館以居之經年累稔終無一驗雖復
誅其身滅其族紛然足爲天下笑矣若夫玄黃
所以娛目鏗鏘所以樂耳媛妃所以紹先蕩秦
所以悅口也何必甘無味之味聽無聲之樂觀
無采之色乎

無米之白乎

無以辨口也何必其無和之和雖無管之樂雖
河以數目豈繼視以樂耳數豈視以發去藻者

又辯道論

此篇出廣弘明集只數語與魏志及舊集畧同餘文俱不載今

另存之

夫神仙之書道家之言乃云傳說上為辰尾宿
歲星降為東方朔淮南王安誅於淮南而謂之
獲道輕舉鉤弋死於雲陽而謂之屍迹柩空其
為虛妄甚矣哉中興篤論之士有桓君山者其
所著述多善劉子駿嘗問人言誠能抑嗜欲闔
耳目可不衰竭乎時庭中有一老榆君山指而
謂曰此樹無情欲可忍無耳目可闔然猶枯槁

腐朽而子駿乃言可不衰竭非談也君山援榆
喻之未是也何者余前爲王莽典樂大夫樂記
云文帝得魏文侯樂人竇公年百八十兩目盲
帝竒而問之何所施行對曰臣年十三而失明
父母哀其不及事教臣鼓琴臣又能導引不知
壽得何力君山論之曰頗得少盲專一內視情
不外鑿之助也先難子駿以內視無益退論竇
公便以不鑿證之吾未見其定論也君山又曰
方山有董仲君者繫獄佯死數日日陷蟲出死
而復生然後竟死生之必死君子所達夫何喻
乎夫至神不過天地不能使蟄蟲夏潛震雷冬
發時變則物動氣移而事應彼仲君者乃能藏
其氣屍其體爛其膚出其蟲無乃大怪乎世有
方士吾王悉所招致其陵有其始廬江有左慈
陽城有郤儉始能行氣導引慈曉房中之術儉
善辟穀悉號三百歲本所以集之於魏國者誠
恐斯人之徒接姦詭以欺衆行妖慝以惑人故
聚而禁之其始者老而有少容自餘術士咸共

歸之然始詞繁寡寔頗竊有怪言若遭秦始皇
漢武帝則復徐福樂大之徒矣桀紂殊世而齊
惡姦人異代而等僞乃如此耶又世虛然有仙
人之說仙人者儻徠後之屬與世人得道化爲
仙人乎夫雉入海爲蜃燕入海爲蛤當夫徘徊
其翼差池其羽猶自識也忽然自投神化體變
乃更與鼃鼈爲群豈復自識翔林薄巢垣屋之
娛乎而顧爲匹夫所調納虛妄之詞信眩惑之
說隆禮以招弗臣傾產以供虛求散王爵以榮
之清閑館以居之經年累稔終無一效或歿于
沙丘或崩乎五柞臨時雖誅其身滅其族紛然
足爲天下笑矣然壽命長短骨體強劣各有人
焉善養者終之勞擾者半之虛用者歿之其斯
之謂歟

之謂燬

為善養者慈之愛歟昔年之國月者為之其慎
且為天下笑矣然壽命身誠骨體後各其人
沙直如捕平正非謂利權其後其誠然
之謂開論以試之慈乎累慈慈無一效如效乘

禽惡鳥論

國人有以伯勞生獻者王召見之侍臣曰世人
同惡伯勞之鳴敢問何謂也王曰昔尹吉甫用
後妻之說殺孝子伯奇吉甫後悟追傷伯奇出
遊于田見鳥鳴于桑見其聲噉然吉甫動心曰
伯勞乎乃撫翼其音尤切吉甫乃顧謂曰伯勞
乎是吾子棲吾輿非吾子飛勿居鳥尋聲而栖
于蓋吉甫遂射殺後妻以謝之故俗惡伯勞之
鳴言所鳴之家必有尸也此好事者附名為之

說而今普傳惡之斯寔否也伯勞以五月而鳴
應陰氣之動陰爲賊害蓋賊害之鳥也其聲鴟
鳴然故俗憎之若其爲人災害愚民之所信通
人之所略也鳥鳴之惡自取憎人言之惡自取
滅不有能累於當世也而凶人之行弗可易梟
鳥之鳴不可更者天性然也昔荆人之梟將巢
於吳鳩遇之曰何去荆而巢吳乎梟曰荆人惡
予之聲鳩曰子不能革子之音則吳楚之民不
異情也爲子計者莫若宛頸戢翼終身勿復鳴
也昔會朝議者有人問曰寧有聞梟食其母乎
有答之者曰嘗聞鳥反哺未聞梟食母也問者
慚唱不善也得螿者莫不訓而放之爲利人也
得蚤者莫不糜之齒牙爲害身也鳥獸昆蟲猶
以名聲見異况夫吉士之與凶人乎

於人之封疆也

曰

詩

亦

亦

以各養其異也夫吉士之與凶人乎

野登者莫不熟之齒平為害良也鳥類長異斷
漸即不善也野獸者莫不信而效之為師人也
百谷之者曰嘗聞鳥又御未聞泉食母也問者
出昔會時籍者有人問曰盜亦聞泉食其我鴉

說

籍田說

昔者神農氏始嘗萬草教民種植今寡人之興
此田將欲以擬乎治國非徒娛耳目而已也夫
營疇萬畝厥田上下經以大陌帶以橫阡此亦
寡人之封疆也日殄沒而歸館晨未昕而即野
此亦寡人之先下也菽藿特疇禾黍異田此亦
寡人之政理也及其息沸涌庇重陰懷有虞撫
素琴此寡人之所習樂也蘭蕙荃蘅植之近疇

此亦寡人之所親賢也藜蓬臭蔚棄之乎遠疆
此亦寡人之所遠佞也若年豐歲登果茂菜滋
則臣僕小人咸取驗焉

又籍田說

封人有能以輕鑿脩鉤去樹之蝟者樹得以繁
茂中舍人曰不識治天下者亦有蝟乎寡人告
之曰昔三苗共工鯀驩兜非堯之蝟與商曰諸
侯之國亦有蝟乎寡人告之曰齊之諸國晉之
六卿魯之三桓非諸侯之蝟與然三國無輕鑿
脩鉤之任終於齊篡魯弱晉國以分不亦痛乎
曰不識爲君子者亦有蝟乎寡人告之曰固有
之也富而慢貴而驕殘仁賊義其財悅色亦君

子之竭乎天子勤耘以收一國大夫勤耘以收世祿君子勤耘以顯令德夫農者始於種終於獲澤既時矣苗既美矣棄而不耘則故爲荒疇蓋豐年者期於必收譬脩道亦期於沒身也

鬪髀說

曹子遊乎陂塘之濱步乎藜穢之藪蕭條潛虛經幽踐阻顧見鬪髀塊然獨居於是伏軾而問之曰子將結纓首劔殉國君乎將被堅執銳斃三軍乎將嬰茲固疾命隕傾乎將壽終數極歸幽冥乎叩遺骸而歎息哀白骨之無靈慕嚴周之適楚儻託夢以通情於是佯若有來恍若有存影見容隱厲聲而言曰子何國之君子乎旣枉輿駕愍其枯朽不惜咳唾之音慰以若言子

則辯於辭矣然未達幽冥之情死生之說也夫
死之爲言歸也歸也者歸於道也道也者身以
無形爲主故能與化推移陰陽不能更四時不
能虧是故洞於纖微之域通於恍惚之庭望之
不見其象聽之不聞其聲挹之不充注之不盈
吹之不凋嘘之不榮激之不流凝之不停寥落
冥漠與道相拘偃然長寢樂莫是踰曹子曰予
將請之上帝求諸神靈使司命輟籍反子骸形
於是羈體長呻廓然歎曰甚矣何子之難語也
太素氏不仁勞我以形苦我以生今也幸變而
之死是反吾真也何子之好勞而我之好逸子
則行矣予將歸於太虛於是言卒響絕神光霧
除顧將旋軫乃命僕夫拂以玄塵覆以縞巾爰
將藏彼路濱覆以丹土翳以綠榛夫存亡之異
世乃宣尼之所陳何神憑之虛對云死生之必
均

洪濤如祖鬻鬻以丹土綴以絲赫夫并寸之異
 劍斷洪波鍾以命對夫赫以玄壘要以絲中爰
 以於矣行洪濤然太皇外長言平醫絲斷出露
 之函是又吾真也何于之孩勞而海之孩豈于
 太素丹不身勞未以洪苦勞以止今出華變之而

陳思王集卷之九

魏陳思王曹植子建著

碑

制命宗聖侯孔羨奉家祀碑

維黃初元年大魏受命胤軒轅之高蹤紹紹虞氏
 之遐統應曆數以改物揚仁風以作教於是輯
 五瑞班宗彝鈞衡石同度量秩群祀於無文順
 天時以布化既乃緝熙聖緒昭顯上世追存三
 代之禮兼紹宣尼之後以魯縣百戶命孔子二

十一世孫議郎孔羨爲宗聖侯以奉孔子之祀
制詔三公曰昔仲尼負大聖之才懷帝王之器
當衰周之末而無受命之運在魯衛之朝教化
洙泗之上栖栖焉皇皇焉欲屈已以存道貶身
以救世於是王公終莫能用之乃退考五代之
禮脩素王之事因魯史而制春秋就太師而正
雅頌俾千載之後莫不宗其文以述作仰其聖
以謀咨可謂命世大聖億載之師表者也遭天
下大亂百祀墮壞舊居之廟毀而不脩褒成之
後絕而莫繼闕里不聞講誦之聲四時不睹蒸
嘗之位斯豈所謂崇禮報功盛德必百世祀者
哉嗟乎朕甚憫焉其以議郎孔羨爲宗聖侯邑
百戶奉孔子之祀令魯郡脩起舊廟置百戶卒
吏以守衛之又於其外廣爲屋宇以居學者於
是魯之父老諸生遊士睹廟堂之始復觀俎豆
之初設嘉聖靈於髣髴想禎祥之來集乃慨然
而歎曰大道衰廢禮樂絕滅三十餘年皇上懷
仁聖之懿德兼二儀之化育廣大包於無方淵

深淪於不測故自受命以來天人咸和神氣氤
氲嘉瑞踵武休徵屢臻殊俗解編髮而慕義遐
夷越險阻而來賓雖太皞遊龍以君世虞氏儀
鳳以臨民伯禹命玄宮而爲夏后西伯由岐社
而爲周文尚何足稱於大魏哉若乃紹繼微絕
興脩廢官疇咨稽古崇配乾坤况神明之所福
作宇宙之所觀欣欣之色豈徒魯邦而已哉爾
乃感殷人路寢之義嘉先民泮宮之事以爲高
宗僖公蓋嗣世之王諸侯之國耳猶著德於三
頌騰聲於千載况今聖皇肇造區夏創業垂統
受命之日曾未下輿而褒美大聖隆化如此能
無頌乎乃作頌曰

煌煌大魏受命溥將繼體黃唐包夏含商降釐
下土廓清三光群祀咸秩靡事不綱嘉彼玄聖
有赫其靈遭世霧亂莫顯其榮褒成旣絕寢廟
斯傾闕里蕭條靡韶靡馨我皇悼之尋其世武
乃建宗聖以紹厥後脩復舊堂豐其薨宇莘莘
學徒爰居爰處王教旣新群小邇沮魯道以興

永作憲矩洪聲豈遐神祇來和休徵雜遝瑞我
邦家內光區域外被荒遐殊方慕義搏拊揚歌
於赫四聖運世應期仲尼旣沒文亦在茲彬彬
我后越而五之垂於億載如山之基

頌

皇子生頌

於我聖后憲章前志克纂二皇三靈昭事祇肅
郊廟明德敬惠陽和積吉鍾天之釐嘉月令辰
篤生聖嗣慶由一人萬國作喜喁喁萬國岌岌
群生稟命我后綏之則榮長爲臣妾終天之經
仁聖奕代永載明明同年上帝休祥淑禎藩臣
作頌光流德聲吁嗟卿士祇承予聽

繼世稟命亦曰彩之問洋夏
 燕主聖編夢由一人萬國
 液神甲齋婚惠期味蘇吉
 外非聖司憲章前志京慕
 皇三靈昭華如

皇十主煎

熟

承露盤頌 有序

皇帝鑄承露盤莖長十二丈
 大十圍上盤逕四尺下盤逕五尺
 銅龍遶其根龍身長一丈背負
 兩子自立於芳林園甘露乃降
 使臣為頌頌曰
 岌岌承露峻極太清神若礪硯
 洪其基嶽停下潛醴泉上受雲
 英和氣四支翔風所經匪我明后
 孰能經營近歷纏度三光朗明殊
 俗歸義祥瑞混并鸞鳳晨棲甘露
 宵零神物攸協高而不傾奉天戴
 巍恭統神器固若露盤長存永貴
 贊聖

繼跡奕世明德不忝先功保茲皇極垂作億兆
永荷天秩

明帝與東阿王詔附

昔先帝時甘露屢降於仁壽殿前靈芝生芳
林園中自吾建承露盤以來甘露仍降芳林

園仁壽殿前

孔廟頌

有序

自五帝典絕三皇禮廢應期命世齊賢等聖者
莫高於孔子也故有若曰出乎顯拔乎萃誠所
謂性與天道不可得而聞矣

由也務學名在前志宰予晝寢糞土作誠過庭
子弟詩禮明記歌以詠言文以騁志予今不述
后賢曷識於鑠尼父生民之傑性與天成該聖
備藝德倫三五配皇作烈玄鏡獨鑑神明昭晰
仁塞宇宙志凌雲霓學者三千莫不俊乂唯仁

是憑惟道足恃鑽仰彌高請益不已

舊集摘宗聖侯碑頌

中數語作孔子頌更名此篇為學宮頌今正之

社頌 有序

余前封鄆城侯轉雍丘皆欲為上宅宇初造以府庫尚豐志在善公夫務完圃而已農桑一無所營經離十載瑰然守空饑寒備嘗聖朝愍之故封此縣田則一州之膏腴桑則天下之甲第故封此桑以為田社乃作頌云

於惟太社官名后土是曰勾龍功著上古德配帝王實為靈主克明播植農正日舉尊以作稷豐年是與義與社同方神北宇建國承家莫不

攸叙

姑挂北隰田隕一
 汎營盤鑿十薄
 汎車尚豐志五善
 余前挂灑然封轉
 汎營盤鑿十薄
 汎車尚豐志五善
 余前挂灑然封轉

拆歎

湯妃頌

殷湯令妃有莘之女仁教內脩度儀以處清謹
 后宮九嬪有序伊為媵臣遂作元輔

姜后頌

於鑠姜后光配周宣非禮不動非禮不言晏起
 失朝永巷告愆王用勤政萬國以虔

玄俗頌

玄俗妙識饑餌神穎在陰倏逝卽陽無景逍遙
 北嶽凌霄引領揮霧昊天含神自靜

冬至獻機頌

玉趾既御履和蹈貞行與祿邁動以祥并南闕
北戶西巡王城翱翔萬城聖體浮輕

宜男花頌

草號宜男既曄且貞其貞伊何惟乾之嘉其曄
伊何綠葉丹花光采晃曜配彼朝日君子耽樂
好和琴瑟固作螽斯惟立孔臧福濟太姒末世
克昌

贊

畫贊

有序

蓋畫者鳥書之流昔明德馬后美於色厚於德
帝用嘉之嘗從觀畫過虞舜廟見娥皇女英帝
指之戲后曰恨不得如此爲妃又前見陶唐之
像后指堯曰嗟乎群臣百寮恨不得爲君如是
帝顧而笑故夫畫所見多矣

庖犧贊

木德風姓八卦創焉龍瑞名官法地象天庖厨

陳思王集 卷九 九
祭祀網罟魚畋瑟以像時神德通玄

女媧贊

古之國君造簧作笙禮物未就軒轅纂成或云
二皇人首蛇形神化七十何德之靈

神農贊

少典之胤火德成木造爲耒耜遵民播穀正爲
雅琴以暢風俗

黃帝贊

少典之孫神明聖哲土德承火赤帝是滅服牛
乘馬衣裳是制氏雲名官功冠五帝

黃帝三鼎贊

鼎質文精古之神器黃帝是鑄以像太乙能輕
能重知凶識吉世衰則隱世和則出

少昊贊

祖自軒轅青陽之裔金德承土儀鳳帝世官鳥
號名殊職別系農正扈氏各有品制

顓頊贊

昌意之子祖自軒轅始誅九黎水德統天以國

陳思王集 卷九
爲號風化神宣威暢八極靡不祇虔

帝嚳贊

祖自軒轅玄囂之裔生言其名木德帝世撫寧
天地神聖靈察教弭四海明並日月

帝堯贊

火德統位父則高辛克平共工萬國同塵調適
陰陽其惠如春巍巍成功配天則神

帝舜贊

顓頊之族重瞳神聖克協頑瞽應唐泄政除凶

舉俊以齊七政應曆受禪顯天之命

夏禹贊

吁嗟天子拯世濟民克卑宮室致孝鬼神蔬食
薄服黻冕乃新厥德不回其誠可親疊疊其德
溫溫其仁尼稱無間何德之純

禹治水贊

嗟夫夏禹實勞水功西鑿龍門疏河道江梁岐
旣闢九州以同天錫玄圭奄有萬邦

禹渡河贊

禹濟于河黃龍負船舟人竝懼禹歎仰天子授
大運勤功恤民死亡命也龍乃弭身

殷湯贊

殷湯伐夏諸侯振仰放桀鳴條南面以王桑林
之禱災災克償伊尹佐治可謂賢相

湯禱桑林贊

惟殷之世炎旱七年湯禱桑林祈福于天翦髮
離爪自以爲牲皇靈感應時雨以零

周文王贊

於赫聖德寔惟文王三分有二猶服事商化加
虞芮傍聞四方王業克昭武嗣遂光

周文王赤雀贊

西伯積德天命攸顧赤雀銜書爰集昌戶瑞爲
天使和氣所致嗟爾後王昌期而至

周武王贊

桓桓武王繼世滅殷咸任尚父且作商臣功冒
四海救世濟民天下宗周萬國是賓

周公贊

成王卽位年尚幼稚周公居攝四海慕利罰叛
柔服祥應仍至誦長反政達天忠義

周成王贊

成王繼武賢聖保傳年雖幼稚岐嶷有素初疑
周公終焉克寤日奭佐治遂致刑錯

漢高帝贊

屯雲斬蛇靈母告祥朱旗旣抗九野披攘禽嬰
克羽掃滅英雄承機帝世功著武湯

漢文帝贊

孝文卽位愛物儉身驕吳撫越匈奴和親納諫
赦罪以德讓民始至刑錯萬國化淳

漢景帝贊

景帝明德繼文之則肅清王室克滅七國省役
薄賦百姓殷昌風移俗易齊美成康

漢武帝贊

世宗光光文武是攘威振百蠻恢拓土疆簡定
律曆辯脩舊章封天禪土功越百王

姜嫄簡狄贊

陳思王集 卷九
魯有四妃子皆爲王帝摯且崩堯承天綱玄鳥
大跡殷周美祥稷契旣生翊化虞唐

禹妻贊

禹娶塗山土功是急聞啟之生過門不入女嬌
達義明勲是執成長聖嗣天祿以襲

班婕妤贊

有德有言實惟班婕盈冲其驕窮其厭悅在夷
貞艱在晉正接臨颺端幹衝霜振葉

吹雲贊

天地變化是生神物吹雲吐潤浮氣蒼鬱

巢父贊

堯禪許由巢父是耻穢其溷聽臨河洗耳池主
是讓以水爲濁嗟此三士清足厲俗

務光贊

湯將伐桀謀於卜子旣聞讓位隨以爲耻薄於
殷世著自汙已自投潁水清風邈矣

商山四皓贊

嗟爾四皓避秦隱形劉項之爭養志弗營不應

朝聘保節全貞應命太子漢嗣以寧

長樂觀畫贊

妙哉平生才巧若神辭賦之作華若望春

銘

寶刀銘

造茲寶刀既鑿既礪匪以尚武予身是衛麟角
是觸鸞距匪蹶

板木意在感焉聊依天帝之命

治之所與致也

吳黼黻

崇茲寶以昭尊
有顛以尚近
其長漸難用

寶八

繪

文

誥咎文

有序

五行致災先史咸以為應政而作天地之氣自有變動未必政治之所興致也于時大風發屋板木意有感焉聊假天帝之命以誥咎祈福辭

曰

上帝有命風伯雨師夫風以動氣雨以潤時陰陽協和氣物以滋亢陽害苗暴風傷條伊周是遇在湯斯遭桑林既禱慶雲克舉偃禾之復姬

公去楚况我皇德承天統民禮敬川嶽祈肅百
神享茲元吉釐福日新至若炎旱赫羲颺風扇
發嘉卉以委良木以拔何谷宜填何山應伐何
靈宜論何神宜謁於是五靈振悚皇祇赫怒招
搖驚怯攬搶奮斧河伯典澤屏翳司風迴呵飛
廉顧叱豐隆息颺遏暴元勅華嵩高慶雲是興效
厥豐年遂乃沈陰塊北其澤微微雨我公田爰
暨于私黍稷盈疇芳草依依靈禾重穗生彼邦
畿年登歲豐民無餒饑

釋愁文

予以愁慘行吟路邊形容枯悴憂心如醉有玄
靈先生見而問之曰子將何疾以至於斯答曰
吾所病者愁也先生曰愁是何物而能病子乎
答曰愁之爲物惟恍惟惚不召自來推之弗往
尋之不知其際握之不盈一掌寂寂長夜或群
或黨去來無方亂我情爽其來也難返其去也
易追臨餐困於哽咽煩寃毒於酸嘶加之以粉
飾不澤飲之以兼肴不肥温之以金石不消磨

之以神膏不希授之以巧笑不悅樂之以絲竹
增悲醫和絕思而無措先生豈能爲我著龜乎
先生作色而言曰予徒辯子之愁形未知子愁
所由而生我獨爲子言其歎矣方今大道旣隱
子生末季沉溺流俗眩惑名位濯纓彈冠諮趣
榮貴坐不安席食不終味遑遑汲汲或憔悴
所鬻者名所拘者利良由華薄凋損正氣吾將
贈子以無爲之藥給子以淡薄之湯刺子以玄
虛之針灸子以淳朴之方安子以恢廓之宇坐
子以寂寞之床使王喬與子遨遊而逝黃公與
子詠歌而行莊子與子具養神之撰老聃與子
致愛性之方趣避路以棲跡乘輕雲以翱翔於
是精駭魂散改心回趣願納至言仰崇玄旨衆
愁忽然不辭而去

憑忽然不輟而去

長辭想賦惜如心回賦願際至言吟崇文旨衆
姪愛卦之六越越韻以對湘乘運雲以續機城
于信福而于菲于典于具養輔之琳法細與于
于以窳莫之太尉王喬與于涉涉而而黃公與

陳思王集卷之十

魏陳思王曹植子建著

誄

武帝誄

於惟我王承運之哀神武震發群雄戡夷拯民
于下登帝太微德美日奭功越彭韋九德光備
萬國作師寢疾不興聖體長遼華夏飲淚黎庶
含悲神翳功顯身沈名飛敢揚聖德表之素旗
乃作誄曰

於穆我王甯穆胤周賢聖是紹元懿允休先侯
佐漢實維平陽功成績著德昭二皇民以寧一
興詠有章我王承統文姿特生年在志學謀過
老成奮臂舊邦翻身上京表與我王兵交若神
張陳背誓傲帝虐民擁徒百萬虎視朔濱我王
赫怒戎車列陳武卒虓闕如雷如震攙搶北掃
舉不浹辰紹遂奔北河朔是賓振旅京師帝嘉
厥庸乃位丞相摠攝三公光受上爵君臨魏邦
九錫昭備大路火龍玄鑑靈察探幽洞微下無
佞情姦不容非敦儉尚古不玩珠玉以身先下
民以純樸聖性嚴毅平脩清一惟善是嘉靡疏
靡昵怒過雷霆喜踰春日萬國肅虔望風震慄
旣摠庶政兼覽儒林竊著雅頌被之瑟琴茫茫
四海我王康之微微漢嗣我王匡之群僚扇動
我王服之喁喁黎庶我王育之光有天下萬國
作君虔奉本朝德美周文以寬克衆每征必舉
四夷賓服功夷聖武翼帝王世神武鷹揚左鉞
右旄威凌伊呂年踰耳順體愉志肅乾乾庶事

陳思王集 卷十
氣過方叔宜竝南嶽君國無窮如何不弔禮鍾
聖躬棄離臣子背世長終兆民號咷仰懇上穹
旣以約終令節不衰旣卽梓宮躬御綴衣璽不
存身唯紼是荷明器無飾陶素是嘉旣次西陵
幽閨啟路群臣奉迎我王安厝窈窕玄宇三光
不晰幽闈一扃尊靈未蟄聖上臨穴哀號靡及
群臣陪臨佇立以泣去此昭昭於彼冥冥未棄
兆民下君百靈千代萬乘曷時復形

文帝誄

惟黃初七年五月七日大行皇帝崩嗚呼哀哉
于時天震地駭崩山隕霜陽精薄景五緯錯行
百姓吁嗟萬國悲悼若喪考妣恩過慕唐擗踊
郊埜仰想穹蒼僉曰何辜早世隕喪嗚呼哀哉
悲夫大行忽焉光滅永棄萬民雲往雨絕承問
慌惚惛懵哽咽袖鋒抽刃欲自僵斃追慕三良
甘心同穴感彼南風惟以鬱滯終於偕沒指景
自誓考諸先紀尋之哲言生若浮寄惟德可論

朝聞夕逝孔志所存皇雖殪歿天祿未延何以
述德表之素旃何以詠功宣之管絃乃作誄曰
皓皓太素兩儀始分中和產物肇有人倫爰暨
三皇寔秉道真降逮五帝繼以懿純三代製作
踵武立勳季嗣不維網漏于秦崩樂滅學儒坑
禮焚二世而殲漢氏乃因弗求古訓羸政是遵
王綱帝典闕爾無間末光幽昧道究運遷乾坤
回曆簡聖授賢乃眷大行屬以黎元龍飛啟祚
合契主玄正行定紀改號革年明明赫赫受命
于天風偃物化德以禮宣祥惟聖質岐嶷幼齡
研幾六典學不過庭潛心無妄亢志清真才秀
藻朗如玉之瑩聽察無響瞻睹未形其剛如金
其貞如瓊如冰之潔如砥之平爵功無重戮違
無輕心鏡萬機鑒照下情思良股肱嘉昔伊呂
搜揚側陋舉湯代禹拔才巖穴取士蓬戶唯德
是縈弗拘禰祖宅土之中道義是圖弗營厥險
六合是虞齊契共檢導下以純恢拓規矩克紹
前人科條品制褒貶以因乘殷之輅行夏之辰

金根黃屋翠葆龍鱗紉冕崇麗衡統維新尊肅
禮容矚之若神方牧妙舉欽於恤民虎將荷節
鎮彼四鄰朱旗所勦九壤被震疇克不若孰敢
不臣縣旌海表萬里無塵虜備凶徹鳥殪江岷
摧若涸魚乾腊矯鱗肅慎納貢越裳效珍條支
絕域獻款內賓德儕先王功侔太古上靈降瑞
黃初俶祐河龍洛龜陵波遊下平均應繩神鸞
翔舞數莢階除系風扇暑皓獸素禽飛走郊野
神鐘寶鼎形自舊土雲英甘露濺塗被宇靈芝
冒沼朱華陰渚回回凱風祁祁甘雨稼穡豐登
我稷我黍家佩惠君戶蒙慈父圖致太和洽德
全義將登泰山先皇作儷鐫石紀勲兼錄衆瑞
方隆封禪歸功天地賓禮百靈勳命視規望祭
四嶽燎封奉柴肅于南郊宗祀上帝三牲旣供
夏禘秋嘗元侯佐祭獻璧奉璋鸞輿幽藹龍旂
太常爰迄太廟鐘鼓鏗鏘頌德誅功八佾鏘鏘
皇祖旣饗烈考來享神具醉止降茲福祥天地
震蕩大行康之三辰暗昧大行光之皇紘絕維

大行綱之神器莫統大行當之禮樂廢弛大行
張之仁義陸沉大行揚之潛龍隱鳳大行翔之
疏狄遐康大行匡之在位七載元功仍舉將未
太和絕迹三五宜作物師長爲神主壽終金石
等筭東父如何奄息摧身后土俾我皃皃靡瞻
靡顧嗟嗟皇穹胡寧忍務嗚呼哀哉明鹽吉凶
體達存亡深垂典制申之嗣皇聖上虔奉是順
是將乃勅玄宇基于首陽擬迹穀林追堯纂唐
合山同陵不樹不疆塗車芻靈珠玉靡藏百神
警侍來賓幽堂耕禽田獸望魂之翔於是俟大
隧之致功兮練元辰之淑禎潛華體於梓官兮
馮正殿以居靈顧皇嗣之號咷兮存臨者之悲
聲悼晏駕之既往兮感容車之速征浮飛魂於
輕霄兮就黃墟以藏形背三光之昭晰兮歸玄
宅之冥冥嗟一往之不返兮痛闕闕之長扃咨
遠臣之眇眇兮成凶諱以怛驚心孤絕而靡告
兮紛流涕而交頸思恩榮以橫奔兮闕闕塞之
堯峰顧衰經以輕舉兮念關防之我嬰欲高飛

陳思王集 卷十
而遙憇今憚天網之遠經遙投骨於山足今報
恩養於下庭慨拊心而自悼今懼施重而命輕
嗟微軀之是效今甘九死而忘生幾司命之役
籍兮先黃髮而隕零天蓋高而察卑兮冀神明
於我聽獨鬱伊而莫告今追顧景而憐形奏斯
文以寫思兮結翰墨以敷誠嗚呼哀哉

卞太后誄

率土噴薄三光改度陵頽谷踊五行錯互皇室
蕭條羽檄四布百姓歔歔嬰兒號慕若喪考妣
天下縞素聖者知命殉道寶名義之攸在亦棄
厥生敢揚后德表之旒旌光垂罔極以慰我情
乃作誄曰

我皇之生坤靈是輔作合于魏亦光聖武篤生
文帝紹虞之緒龍飛紫宸奄有九土詳惟聖善
岐嶷秀出德配姜嫄不忝先哲玄覽萬機兼才

備藝汎納容衆含垢藏疾仰奉諸姑降接儔列
陰處陽潛外明內察及踐大位母養萬國溫溫
其人替明德悼彼邊氓未遑宴息恒勞庶事
兢兢翼翼親桑蠶館爲天下式樊姬霸楚書載
其庸武王有亂孔歎其功我后齊聖克暢丹聰
不出房闥心照萬邦年踰耳順乾乾匪倦珠玉
不玩躬御締練日旰忘饑臨樂勿讌去奢卽儉
曠世作顯慎終如始蹈和履貞恭事神祇昭奉
百靈躡天踏地祇畏神明敬微慎獨執禮幽冥
虔肅宗廟蠲薦三牲降福無疆祝云其誠宜享
斯祐蒙祉自天何圖凶咎不免斯年嘗禱盡禮
有篤無痊豈命有終神食其言遺孤在疚承諱
東藩擗踊郊甸洒淚中原追號皇妣棄我何遷
昔垂顧復今何不然空宮寥廓棟宇無煙巡省
階塗髣髴櫺軒仰瞻帷幄俯察几筵物不毀故
而人不存痛莫酷斯彼蒼者天遂臻魏都游魂
舊邑大隧開塗靈魄斯戢歎息霧興揮淚雨集
徘徊輻輳號咷弗及神光旣幽佇立以泣

陝思王集 卷十
雷動雨徂橫行燕代威懾北胡奔虜無竄還戰
高柳王率壯士常爲軍首宜究長年未保皇家
如何奄忽景命不遐同盟飲淚百寮咨嗟

大司馬曹休誄

於穆公侯魏之宗室明德繼踵奕世純粹闡弘
汎愛仁以接物藝以爲華體斯亮實年沒弱冠
志在雄英高揖名師發言有章東夏翕然稱曰
龍光貧而無怨孔以爲難嗟我公侯屢空是安
不耽世祿親悅爲歡好彼蓬樞其此瓢簞味道
忘憂踰憲超顏矯矯公侯不撓其厄呵叱三軍
躬奮雉戟足蹴白刃手按飛鏑終弭淮南保我

疆場

陶思王集 卷十
光祿大夫荀侯誄

如水之清如玉之潔法而不威和而不藝百寮
士庶欷歔霑纓機女投杼農夫輟畊輪結轍而
不轉馬悲鳴而倚衡

王仲宣誄

建安二十二年正月二十四日戊申魏故侍中
關內侯王君卒嗚呼哀哉皇穹神察詰人是恃
如何靈祗殲我吉士誰謂不痛早世卽冥誰謂
不傷華繁中零存亡分流天遂同期朝聞夕沒
先民所思何用誄德表之素旗何以贈終哀以
送之遂作誄曰

猗歟侍中遠祖彌芳公高建業佐武伐商爵同
齊魯邦嗣絕亡流裔畢萬勲績惟光晉獻賜封

于魏之疆天開之祚末胄稱王厥姓斯氏條分
葉散世滋芳烈揚聲秦漢會遭陽九炎光中矇
世祖撥亂爰建時雍三台樹位履道是鍾寵爵
之加匪惠惟恭自君二祖爲光爲龍僉曰休哉
宜翼漢邦或統太尉或掌司空百揆惟叙五典
克從天靜人和皇教遐通伊君顯考奕葉佐時
入管機密朝政以治出臨朔岱庶績咸熙君以
淑懿繼此洪基既有令德材技廣宣強記洽聞
幽讚微言文若春華思若涌泉發言可誅下筆

成篇何道不洽何藝不閑棊局逞巧博奕惟賢
皇家不造京室隕顛宰臣專制帝用西遷君乃
羈旅離此阻艱翕然鳳舉遠竄荆蠻身窮志達
居鄙行鮮振冠南嶽濯纓清川潛處蓬室不干
勢權我公奮鉞耀威南楚荆人或違陳戎講武
君乃義發筭我師旅高尚霸功投身帝宇斯言
旣發謀夫是與是與伊何響我明德投戈編郡
稽顙漢北我公寔嘉表揚京國金龜紫綬以彰
勲則勲則伊何勞謙靡已憂世忘家殊略卓峙

乃署祭酒與君行止筭無遺策畫無失理我王
建國百司俊乂君以顯舉秉機省闕戴蟬珥貂
朱衣皓帶入侍帷幄出擁華蓋榮耀當世芳風
晻藹嗟彼東夷憑江阻湖騷擾邊境勞我師徒
光光戎輅霆駭風徂君侍華轂輝耀王塗思榮
懷附望彼來威如何不濟運極命衰寢疾彌留
吉往凶歸嗚呼哀哉翩翩孤嗣號慟崩摧發軫
北魏遠迄南淮經歷山河泣涕如頽哀風興感
行雲徘徊游魚失浪歸鳥忘棲嗚呼哀哉吾與
夫子義貫丹青好和琴瑟分過友生庶幾還年
攜手同征如何奄忽棄我夙零感昔宴會志各
高厲予戲夫子金石難弊人命靡常吉凶異制
此歡之人孰先隕越何寤夫子果乃先逝又論
死生存亡數度子猶懷疑求之明據儻獨有靈
游魂泰素我將假翼飄颻高舉超登景雲要子
天路喪柩旣臻將及魏京靈輜迴軌白驥悲鳴
虛廓無見藏影蔽形孰云仲宣不聞其聲延首
歎息雨泣交頸嗟乎夫子永安幽冥人誰不歿

卷十
達士徇名生榮死哀亦孔之榮嗚呼哀哉

巫生亦十嫂魏子謝謝魏子之靈
此薄之人據其則法何異天子果亦以法
高風于趙夫千金可換人命何難言吉凶異
謝手回並收可事必業外必之想言其會志
夫于養實具青歌咏琴瑟必能入土清溪

平陽懿公主誄

俯振地紀仰錯天文悲風激興霜焱雪雰凋蘭
天蕙良榦以泯於惟懿主瑛瑤其質協策應期
含英秀出岐嶷之姿實朗實極在生十旬察人
識物儀同聖表聲協音律驥眉識往俛瞳知來
求顏必笑和音則該阿保接手侍御充傍常在
襁褓不停幃牀專愛一宮取玩聖皇何圖奄忽
罹天之殃魂神遷移精爽翱翔號之不應聽之
不聆帝用吁嗟嗚呼哀哉憐爾早沒不逮陰光

改封大郡惟帝舊疆建土開家邑移蕃王琨珮
惟鮮朱紱斯煌國號旣崇哀爾孤獨配爾君子
華宗貴族爵以列侯銀艾優渥成禮于宮靈輻
交轂生雖異室歿同山嶽爰構玄宮玉石交連
朱房皓璧皓曜電鮮飾終備衛法生象存長埏
繕脩神閨掩扉二柩竝降雙魂孰依人誰不歿
憐爾尚微阿保激摧上聖傷悲城闕之詩以日
踰歲况我愛子神光長滅扃關一闔曷其復斯

蒼舒誄

建安十二年五月甲戌童子曹蒼舒卒乃作誄
曰

於惟淑弟懿矣純良誕豐令質荷天之光旣哲
且仁爰柔克剛彼德之容慈我聿行宜逢分祚
以求無疆如何昊天凋斯俊英嗚呼哀哉惟人
之生忽若朝露促促百年疊疊行暮矧爾旣夭
十三而卒何辜于天景命不遂

且二爻乘克圖斯辭之密慈家準以宜發公報
外卦賊乘續矣絲其結豐及習商天之武刑許

曰

魏安十一年正月甲子童子曹芳字子丹孫

曹芳

哀辭

仲雍哀辭

曹喈字仲雍魏太子之仲子也三月而生五月
而亡昔后稷之在寒冰鬪穀之在楚澤咸依鳥
馮虎而無風塵之灾今之玄緜文茵無寒冰之
慘羅帟綺帳暖於翔鳥之翼幽房閑宇密於雲
夢之野慈母良保仁乎鳥虎之情卒不能延期
於慕載雖六旬而天殃彼孤蘭之眇眇亮成幹
其畢榮哀綿綿之弱子早背世而潛形且四孟

之未周將願之乎一齡陰雲回於素蓋悲風動
其扶輪臨埏闔以欷歔淚流射而沾巾

金瓠哀辭

金瓠予之首女雖未能言固已授色知心矣生
十九旬而夭折乃作此辭辭曰

在襁褓而撫育向孩笑而未言不終年而夭絕
何見罰於皇天信吾罪之所招悲弱子之無咎
去父母之懷抱滅微骸於糞土天長地久人生
幾時先後無覺從爾有期

行女哀辭

行女生于季秋而終于首夏三年之中二子頻
喪伊上帝之降命何短脩之難裁或華髮以終
年或懷妊而逢災感前哀之未闕復新殃之重
來方朝華而晚敷比辰露而先晞感逝者之不
追悵情忽而失度天蓋高而無階懷此恨其誰
訴

附錄

陳思王傳

晉陳壽

陳思王植字子建年十歲餘誦讀詩論及辭賦
數十萬言善屬文太祖嘗視其文謂植曰汝倩
人邪植跪曰言出爲論下筆成章顧當面試柰
何倩人時鄴銅爵臺新成太祖悉將諸子登臺
使各爲賦植援筆立成可觀太祖甚異之性簡
易不治威儀輿馬服飾不尚華麗每進見難問
應聲而對特見寵愛建安十六年封平原侯十

九年徙封臨菑侯太祖征孫權使植留守鄴戒之曰吾昔爲頓丘今年二十三思此時所行無悔于今今汝年亦二十三矣可不勉與植旣以才見異而丁儀丁廙楊脩等爲之羽翼太祖狐疑幾爲太子者數矣而植任性而行不自雕勵飲酒不節文帝御之以術矯情自飾宮人左右竝爲之說故遂定爲嗣二十二年增置邑五千并前萬戶植嘗乘車行馳道中開司馬門出太祖大怒公車令坐死由是重諸侯科禁而植寵

日衰太祖旣慮終始之變以楊脩頗有才策而又袁氏之甥也於是以罪誅脩植益內不自安二十四年曹仁爲關羽所圍太祖以植爲南中郎將行征虜將軍欲遣救仁呼有所勅戒植醉不能受命於是悔而罷之文帝卽王位誅丁儀丁廙并其男口植與諸侯竝就國黃初二年監國謁者灌均希指奏植醉酒悖慢劫脅使者有司請治罪帝以太后故貶爵安鄉侯其年改封鄆城侯三年立爲鄆城王邑二千五百戶四年

徙封雍丘王其年朝京都上表獻詩二篇帝嘉其辭義優詔答勉之六年帝東征還過雍丘幸植宮增戶五百太和元年徙封浚儀二年復還雍丘植常自憤怨抱利器而無所施上疏求自試三年徙封東阿五年復上疏求存問親戚因致其意詔報如王所訴植復上疏陳審舉之義帝輒優文答報其年冬詔諸王朝六年正月其二月以陳四縣封植爲陳王邑三千五百戶植每欲求別見獨談論及時政幸冀試用終不能得旣還悵然絕望時法制待藩國旣自峻迫寮屬皆賈豎下才兵人給其殘老大數不過二百人又植以前過事事復減半十一年中而三徙都常汲汲無歡遂發疾薨時年四十一遺令薄葬以小子志保家之主也欲立之初植登魚山臨東阿喟然有終焉之心遂營爲墓子志嗣徙封濟北王景初中詔曰陳思王昔雖有過失旣克已慎行以補前闕且自少至終篇籍不離於手誠難能也其收黃初中諸奏植罪狀公卿已

下議尚書中書秘書三府大鴻臚者皆削除之
撰錄植前後所著賦頌詩銘雜論凡百餘篇副
藏內外志累增邑并前九百九十戶

與平原侯書

魏劉 楨

家丞邢顒北土之彥少秉高節玄靜澹泊言少
理多真雅士也楨誠不足同貫斯人竝列左右
而楨禮遇殊特顒反疏簡私懼觀者將謂君侯
習近不肖禮賢不足採庶子之春華忘家丞之
秋實爲上招謗其罪不小以此反側

又

明使君始垂哀憐意眷目崇譬之疾病乃使炎
農分藥岐伯下鍼疾雖未除就沒無恨何者以

其天醫至神而榮魄自盡也

又

經陳思王墓

梁庾肩吾

公子獨憂生
丘壠擅餘名
採樵枯樹盡
犁田荒隧平
寧追宴平樂
詎想謁承明
旦余來錫命
兼言事結成
飄飄河朔遠
颭颭颶風鳴
鴈與雲俱陣
沙將蓬共驚
枯桑落古社
寒鳥歸孤城
隴水哀葭曲
漁陽慘鼓聲
離家來遠客
安得不傷情

交莫世魚湯參婦
 刺必耕藝其驚故桑菴古垣寒鳥韻亦耕淵水
 言率故丸鷹鷹何勝恣颯颯颯颯颯颯颯颯颯
 劉平寧豈宴平樂詰懸壽承用且余來驗命兼
 公子斷憂坐立辭獸翁谷林熱林陸盡學田荒
 豨刺思王墓
 樂與自苦

遺事

丁虞嘗謂太祖曰臨苗侯天性仁義發於自然
 而聰明智達其殆庶幾至博學淵識文章絕倫
 今天下賢才君子不問少長皆願從其游而為
 之死實天所以鍾福大魏而未授無窮之祚也
 太祖曰植吾愛之安能若卿言吾欲立之為嗣
 何如虞曰此國家所以興衰天下所以存亡非
 瑣賤所敢與及虞聞知臣莫若君知子莫若父
 至於君不論明闇父不問賢愚而能常知臣子

者何蓋由相知非一事一物相盡非一旦一夕
况明公加之以聖哲習之以人子今發明達之
命吐未安之言可謂上應天命下合人心得之
須臾垂之萬世者也太祖深納之

文士傳

太祖遣邴鄆淳詣曹植植初得淳甚喜延入坐
不先與談時天暑熱植呼常從取水自澡訖傳
粉遂科頭拍袒胡舞五椎鍛跳丸擊劍誦俳優
小說數千言訖謂淳曰邴鄆生何如邪於是乃
更着衣幘整儀容與淳評說混元造化之端品

物區別之意然後論羲皇以來賢聖名臣烈士
優劣之差次頌古今文章賦誄及當官政事宜
所先後又論用武行兵倚伏之勢乃命厨宰酒
炙交至坐席默然無與伉者及暮淳歸對其所
知歎植謂之天人

魏略

韓宣於東掖門內與臨菑侯植相遇時天新雨
地有泥潦宣欲避之闕潦不得去乃以扇自障
住道邊植駐車使常從問宣何官宣云丞相軍
謀掾也植又問應得唐突列侯否宣曰春秋之

義王人雖微列于諸侯之上未聞宰士而為下
士諸侯禮也植又曰即如所言為人父吏見其
子應有禮否宣又曰於禮臣子一列也而宣年
又長植知其枝柱難窮乃釋去具為太子言以
為辯

魏略

曹子建七步成章世目為繡虎

世說新語

植未到關自念有過宜當謝帝乃留從官著關
東單將兩三人微行入見清河長公主欲因主
謝而關吏以聞帝使人逆之不見太后以為自

殺也對帝泣會植科頭負鈇鑕徒跣詣闕帝及
太后乃喜及見帝猶嚴顏色植伏地泣涕太后
為不樂詔乃聽復王服

魏略

是時待諸國法峻任城王暴薨諸王懷友于之
痛植及白馬王彪還國欲同路東歸以叙隔闊
監國使者不聽植發憤告離而作詩

魏氏春秋

金灑谷三水合處有千金竭即魏陳思王所立
引水東灌民今賴之

戴延之西征記

陳思王有神思為鴨頭杓浮於九曲酒池王意

有所勸鴨頭則迴向之又爲鵲尾杓柄長而直
王意有所到處於罇上鏃之鵲則指之

太平廣記

韓仲卿夢一烏幘少年風姿磊落神仙人也言
某有文集在建鄴李氏公爲我傳而叙之我亦
陰報爾仲卿諾之去復回曰我曹植子建也仲
卿旣寤檢鄴中書得子建集分爲十卷

晉武嘗閱六代論問曹志曰是卿先王所作邪
志對曰先王有手所作目錄請歸尋按還奏按
錄無此以臣所聞是臣族父罔所作以先王文
高名著欲令書傳於後是以假託帝謂公卿曰
父子證明足以爲審自今以後可無復疑

晉書

陰服何仲卿之書卷四曰凡集卷十卷

卿既嘗檢郡中書卿子建集公為十卷

又于荀問吳以馮審自今以終何無參遺譜按

高命善浴令書軒成於吳以對詩詩以公望度

集評

表宜以遠大為本不以華藻為先曹子建之表

可謂成文

李充翰
林論

植詩源出於國風骨氣奇高詞彩華茂情兼怨

雅體被文質繁溢今古卓爾不群嗟乎陳思之

于文章也譬人倫之有周孔鱗羽之有龍鳳音

樂之有琴笙女工之有黼黻俾爾懷鉛吮墨者

抱篇章而景慕映餘暉以自燭故孔氏之門如

有詩則公幹升堂思王入室景陽潘陸自可坐

於廊廡之間矣 詩品

陳思之表獨冠群才觀其體贍而律調辭清而志顯應物製巧隨變生趣執轡有餘故能緩急

應節 文心 雕龍

陳思七啟取美于宏壯 文心 雕龍

君子哉陳思王也其文深以典 文中

植之華采思若有神 魚豢

子建仲宣以氣質為體竝標能擅美獨映當時

沈約

予知章召見延英上問曹植幽思賦何為遠取

景物為句知章曰植賦作不徒然若倚高臺之

曲嶠望且重也處幽僻之閑深位至卑也望翔

雲之悠悠嗟朝霽而夕陰以為物無定止之意

而上多改易也顧秋華之零落歲將暮也感歲

暮而傷心年將易也觀躍魚於南沼使智者居

於明非得志也聆鳴鶴於北林怨寡和也擗素

筆而慷慨守文而感也揚大雅之哀吟憫其時

也仰清風以歎息思濯煩也寄予思於悲絃志

在古也信有心而在遠措者大也重登高以臨
川及上下也何予心之煩錯寧翰墨之能傳意
不盡也此幽思所以賦也龍城錄

斲削精潔自然沈健

詩譜

曹子建之作亦正亦變駸駸大雅之製焉

竹林詩話

曹子建如三河少年風流自賞

孫器之評詩

曹子建詩質樸渾厚春容雋永風調非後人易
到陳子昂李太白慕以為宗信乎晉以下鮮其
儷也予每讀其詩灑然有千古之想

子建朗質靈才天授性得銅雀一賦賞父驚兒
言言皆達肺隱未嘗少假往彩以潤已撰也八
斗之品周孔之喻不誣哉黃勉之

子建謁帝承明廬明月照高樓子桓西北有浮
雲秋風蕭瑟非鄴中諸子可及仲宣公幹遠在
下風吾每至謁帝一章便數十過不可了悲婉

宏壯情事理境無所不有

藝苑卮言

洛神賦王右軍大令各書數十本當是晉人極
推之耳清徹圓麗神女之流藝苑卮言

劉楨王粲詩勝於文兼至者獨臨淄耳

藝苑
卮言

陳思黃雀公幹青松格工才勁並長諷諭

文心
雕龍

美女篇緝洛神之餘材而成之自為淒麗之調

真是才子 詩歸

極風流人生極富貴家處極無聊地方能作此

想窮此趣 詩歸

嘉永三政



書